

EDÈNÀ WA SÀTAANÀ



Twinyikaayi mitu. Nzambi munanga, tudi ne kusakidila Kùdì diloolo edi bwa mpùngà mulenga ewu, bwa kulwa cyakabidi mu Dìnà dya Mukalenge Yesu, bwa kutwilangana ne mwena lukuna wetu, mwena lukuna Webe, mu cyalu cya mvita emu, biikàle ne Dîyì, bwa kumwipata munkaci mwa cisamba Cyebe, bwa baamonaku, diloolo edi, Mukalenge, Bukênkè bwa Evanjeeliyo. Ndi ndomba bwa Wèwè kulaaba mèsù etu ne bwanga bwa mèsù, bwa kwikalawu matabale ku Bulelela, bwa twamona mwa kuumuka kaaba aka, twenda twamba mu myoyi yetu ne: “Myoyi yetu kayivwaku yilakuka kapyia munda mwetu pàvwàYe wakula neetu mu njila apu anyi?” Ondopaku babeedi ne bàdì mu ntatu. Kankamikaku bàdì batekeshiibwe mu maboko. Bândishàku byanza bya butekete bìvwàku musangu kampanda bilebelelele abi. Swaku bwa twikalèku bindile Dilwa dya Mukalenge Yesu, ditùdì twitabuuja ne didi pawîpi adi. Tudi tulomba nunku mu Dìnà dya Yesu. Amen.

Sòmbaayi.

² Nènditàcìshèku bwa kukosoloja bwa diloolo edi, bwalu ndi mumanye ne bààbùngì mbafumine ku bitupa bishiileshiilangane bya ditunga, bwa . . . bwa disangisha, anyi mbashaale too ne pa dîbà edi, bamwe baa kunùdì, nenku bikengela bwa kwalukilabo, pàmwàpa bule bwa njila miine ya dyalukidila. Nenku ndi nnwela twasakidila. Mu dinda emu mvwa njinga kuteelejaku Mwaneetu Neville, mémè mwine. Nenku nkaadi mumuumvumvwe misangu yàbùngì, ne nciitukù mwanji kumuteeleja musangu nansha wumwe nciyi mumwanyishe to. Kadi mu dinda emu, diyishiha difila pa dîbà dyàdì menemene adi, ndi mumanye ne mvwa mupete bulombodi bwa Mukalenge bwa kuditeeleja mu dinda emu. Bilenga bya kacya! Nenku ndi mmona ne ki bwa cinyi nwènù aba nutu baswe peenu kulwa bwa kumuteeleja. Ne yèyè neikalè misangu yònsò anu ne dyambulwisha kunùdì, ndi mutwishiibwe nanku, bwa kwikala numuteeleja.

³ Mvwa nteeta bwa kudipetululaku mu miyiiki yanyi ya babidi leelu ewu, mu dinda emu ne mu mapingaja emu. Nciicidi anu naayi yàbùngì menemene, yàbùngì ya kwenza. Ne ndi . . .

⁴ Bu mùdìbì ne, ngeela meeji, Yetèlò ngwâkambila Mòsà musangu kampanda, wàmba ne: “Bujitu mbupite bùngì bwebè wèwè.” Pa nanku, tudi ne bânà beetu baa balume bùngì cyanaana mwaba ewu bwa maalu àdì manukwate awu. Nenku bumwe ne bumwe bwa ku wòwò awu bùdì bwa mushinga, ne mmaalulu malenga àdì àkèngela kutabaleela. Nenku ndi mufwanyineku kunutuma kùdì mpaasata wetu, anyi Mwaneetu Mann, ne bambi bakwabo baa Diitabuuja dyetu kaaba aka.

Nudi mwa kuyaayi kùdìbo. Bôbò abu mbafwanyine kunwambila anu cintu menemene cìdì cikèngelà kwenza; bamwe bantu, bàna baabo balela, dibwela dya mu mabaka masopakaja, anyi bintu bidì bibi. Nenku bantu aba badiku mwa kunwambulwisha anu mu mushindu wumwewumwe ne—ne muntu mukwabo kana yônsò, bwalu mbasadidi baa Kilisto. Nenku nuyaayi kùdìbo, ne mêmè ndi mutwishiibwe ne bôbò—bôbò nebanupeteshe dyambulwisha dinùdì naadi dijinga adi. Mêmè ncyèna mwa kufika kùdì bwônsò bwabo to. Badi bûngì kabuyi kubala, kwônsò kûyaayà. Badi batentamangana anu kutentamangana, nudi numona's. Nenku—nenku udi ujinga kufika kùdì yônsò wa kùdìbo, kadi kuyiku mwa kukùfika to. Kadi mêmè ndi ntungunuka anu ne kusambila ne, mu mushindu kampanda anyi kansanga, Nzambi anukumbajileku bilenga ciine aci.

⁵ Mpindyewu, diloolo edi, tudi baswe kuya ku Mifundu, ne kubala citupa cya Mufundu wa mu Genese, nshapita mwi3; nenku tuleedileku anu ndambu bimwe bintu bitùdì bambe, mu bikondo bishaale, bwa kumonabi Mukalenge Yesu ní wâtùpèeshabì kabidi ndambu kusakidila ku bitwamanya patwapatuka. Ndi ndomba—ndomba bwa Yèyè ènzè nanku.

Mpindyewu nyoka nguwu mudimuke kupita nyama yônsò wa mu mpàta uwu MUKALENGE Nzambi mufuke. Nenku yèyè kwambila mukaji ne: Eyowa, Nzambi mmwambe ne: Kanudi ku mucu wônsò wa mu budimi anyi?

Ki mukaji kwambilaye nyoka ne: Tudi mwa kudya ku mamuma a mici yidì mu budimi,

Kadi ku mamuma a mucu ùdì munkaci mwa budimi, Nzambi mmwambe ne: Kanukudi to, anyi kanukulengi to, bwa kanulu kufwa.

Ki nyoka kwambilaye mukaji ne: Bulelela kanwakufwa to,

Bwalu Nzambi mmumanye bulelela ne dituku dinwadyaku, dibà adi mèsù enu neatabale, ne nenwikalè bu banzambi, bamanye maalu mimpè ne maalu mabi.

Nenku pàakamòna mukaji ne mucu ùwua mwimpè bwa kudya, ne ùwua wenza disanka ku mèsù, ne mucu wa kwikala kujinga bwa kuvwija muntu ne lungenyi, yèyè wakangata cimuma cyawu, ne wakadya, ne wakapeesha pende bayende uwua nende, ne yèyè wakadya.

Ne mèsù abo bônsò babidi akatabala, ne baakamanya ne bàwua butaka; ne baakatelakaja mabeji a mfigi, ne baakadyenzela mbondya.

⁶ Mukalenge aswe asakidileku . . . mabenesha Ende ku kubala kwa Dìyì Dyende. Mpindyewu ndi muswe kwangata cyena-bwalu diloolo edi, mu cyôci emu, ne kuciinyika dinà ne: *Edènà*

Wa Sàtaanà. Kaacintu kakese be kakole kaa kwamba's kaa ne: *Edènà Wa Sàtaanà.* Cìdì cikumbanangana mu mushindu kampanda, mu diloolo dya dyalumingu dikwabo, ngeela meeji, pâmvwà ngaakula neenu paa *Kasengulu Kàà Muntu Udi Wela Meeji*, ne lulabulu lwa muntu wa cijila.

⁷ Ne misangu mikwabo tuumêyi tukese twa tukole etu tùtu tukatufikisha ku cintu kampanda; tùtu tukatufikisha ku dilonga, ne tukufikisha ku dibala dya Dìyi. Nenku aci ki cìndì mêmè muswe bwa disangisha dyanyi dijima dyènzè. “Muntu kaakwikala ne mwoyi ku dyâmpà nkaayadi to, kadi ku Dìyi dyônsò dìdì dipatuka mukana mwa Nzambi.” Pa nanku, balaayi Dìyi, nuDilongaayi. Ne nuDilongaayi ne mèsù a Nzambi, bwa kupeesha byeledi byenu bya meeji abi dymvwà dya mushindu wa twètù kwikala ne mwoyi mu dituku dya mpindyewu edi.

⁸ Mpindyewu bwa kulwa, diloolo edi, anu bwa kwakulaku neenu, bwa kwamba ne: “Ee, mêmè's ndi mufwanyine kwenza *cikampanda* anyi *cikansanga*, . . .”

⁹ Mêmè ntu munange kwikala kwakulaku ne bantu, anu mùndì mwa kuswa kwikala kuyaku neenu kumbelu ne yônsò wa kunùdì diloolo edi. Ntu. . .Nzambi mmumanye ne ncyà bushuwa. Mvw'a kujingaku kuya kumbelu ne yônsò wa kunùdì, ne—ne kudyaku—kudyaku neenu mu dinda, kadi—kadi—kadi kuya katwa neenu buluwà bwa nshindi maalaba mu mapingaja, nwamonu's. Mvwa—mvwa mwa kujinga kwenzaku nanku, kadi ncyèna—ncyèna ne mushindu wa kwenza nanku to. Ne mvw'a kujinga kuyaku neenu kumbelu ne kusòmba anu cyanaana ne kuyiikilanganaku neenu; kusòmba mu lutanda paanyima paa disangisha, kadi kuyiikilanganaku neenu katanci, kuyiikila neenu pa munùdì balaadile ne pa bidì bitàngilà Nzambi. Mvw'a kuswaku kwenza nanku. Balume ne bakaji muneemu emu; Nzambi mmumanye ne mvw'a kujingaku kwenza nanku, kadi ncyèna ne mushindu wa kucyenza to. Nwamonu's, kùdì anu dikokiibwa dya menemene—dya menemene ne dilubakana kampanda.

¹⁰ Ne—ne mu cikondo cya dibinduluka citùdì ne mwoyi eci. . . Ne mêmè s'ndi muntu udi ubinduluka, mêmè mwine ewu. Leelu ndi ne meeji apangadika cintu kampanda ne: “Bikengela anu ncyènzè,” kadi maalaba cisanganyiibwa mu ntanta wa mùliyô mujima wa kilomeeta kule naanyi; cintu kampanda ncicyamakanane ne cyenze *cikampanda* anyi *cikansanga*. Nenku, mbikole pawùdì uteetaku kubumbakaja meeji kaaba kamwe.

¹¹ Kadi cìndì mêmè ntamba kujinga kukumbaja nkuyiisha Evanjeeliyo mu Ekeleziya, ne kwenza cyônsò cìndiku paanyi mwa kwenza aci bwa kutwadila Yesu Kilisto luumu mu dituku edi, pâncidì pa buloba apa, ne mu cikondo ciine cìdì cinshaadile pa buloba. Ndi mulwe mbwà—mbwà kuteeta kunwambilaku cintu kampanda cìdì cifwanyine

kunwambulwisha; cintu kampanda. Ndi mulonge paanyima paa mêmè mumane kwalukila kwanyi kumbelu mu dinda emu. “Cîndîku mufwanyine kwamba diloolo edi ncinyi, Mukalenge, cidîku cifwanyine kwambulwisha bantu bàba?”

¹² Pâmvwà nteeleja diyîisha dya bukole adi mu dinda emu pa...divwà Mwaneetu Neville mututwadile adi, pa...Mêmè kwamba mundamunda ne divwa dilenga dya kacya, mushindu mwine wâmbiye mwab’awu ne: “Ngangabuka ùdi wàngula disaamà; kadi muntu udi ulwa ne mpanù mùle tente ne nshingi awu, yèyè ngudi utwangana lushingi.” Pa nanku mêmè kudyambidila mundamunda ne aci cìvwa bulelela ngaakwîlu mukese mulenga wa—wa menemene. Mêmè kwela meeji ku cyôcì aci ne, “cilami cya muntu ku disaamà, paanyima paa disaamà dimana kwangula.” Pa nanku aci’s ncintu cilenga cya kacya.

¹³ Mvwa njinga kwakula neenu pa cintu kampanda, kutwala cintu kampanda bwa kunutookeshila mulayi wa Nzambi bwa cikondo eci. Nwamonu anyi? Cintu kampanda, kacyi cintu cìvwà muntu mukwabo kampanda mu dituku dikwabo kampanda to, kadi cintu kampanda...ne pîikalà...Bintu abi bìdi anu bîmpè; twètù bônso tutu tuleedila ku bintu abi. Kadi mêmè mvwa ngeela meeji ne mvwa mufwanyine kuteetaku kunuvulwija cintu kampanda, ku Mifundu yîndi mufunde kaaba aka eyi, cidì cifwanyine kunutookeshila, bwa kumanya, bwa kukuvwija disalaayi ditambe bwîmpè mu cyalu cya mvita mùdì munkaci mwa kulwangana mvita mpindyewu amu; bwa kuyiila màyelè a mwena lukuna, bwa wamòna mwa kujîka bintu byônso kumpala kwa kukupetabi, nwamonu’s. Ki cintu cya mushinga ncyôcì aci, nkyiila mwa kupangisha makofi bwa kaàkukwaci to, ne mwebe mwônso.

¹⁴ Mpindyewu, tutangilaayaaku mpindyewu dinene edi... bwa tusunsa tukese cyanaana, dituku dinene, dibi ditùdì ne mwoyi mpindyewu edi. Ncyèna ngiitabuuja ne kukaadiku dituku dînkadì mubale mu maalû malonda...Kukaadi kulwalwalwe matuku matambe bunene a dikengeshangana, pàvwà bânà baa Nzambi bashipiibwa ku nseke yônso. Kadi pa kumona diseeswishangana dya mwena lukuna, kacya katûtukù banji kupeta dituku bu ditùdì ne mwoyi mpindyewu edi to. Ndituku dya ditambe kwikala dya budimu, dya diseeswishangana. Ne pândi mmona aci, cidì citwala eci, ne, bìdi bikengela bwa mwena Kilisto kwikalaye mutape ntaala mudimuke leelu ewu kutamba mùtùye kacya mu cikondo kana cyônso.

¹⁵ Mpindyewu, kale mu matuku a dikengeshangana, a Loomo awu, dikengesha dya Ekeleeziya, mwena Kilisto mwenze cilema, ùvwa uya mu cipalu cya manayi ne bamwelela nyama ya ntambwe bwa kumudyayi, anyi cintu kampanda cya mushindu awu, pàvwàbo basangana ne yèyè uvwa mwena Kilisto ku bujaadiki bwende. Kadi musuuka wende wùvwa musungidiibwe, bwalu yèyè uvwa mwena kwitabuuja mukezuke

wa Nzambi, wa kayi musopakajaku to, ne mutwe ne disanka dyònsò citampi ne mashi ende ku bujaadiki bwende. Pàvwà mijilu yidilekelela, anyi masoso mu mubidi wende, ne mashi azololoka, yèyè uvwa mwa kwela lubila lukole, mwikàle ne diitabuuja dya lulamatu lwa bushuwa, wàmba ne: “Akidila nyuma wanyi, Mukalenge Yesu!”

¹⁶ Kadi, mpindyewu, budimu bwa dyabulu mpindyewu, bùdi bwitabuujiya bantu ne mbeena Kilisto kadi pààbo kabayi cyòci aci to. Kì cintu ncyòci aci. Kabyena bikengela bwa wèwè kutwa citampi. . . Didì—dìdi ndituku dya budimu kutamba bùdi bufwanyine kwikalaku, kutamba bwa pàvwàbi bikengela bwa wèwè kutwa citampi ku mwoyi webe—webe ku bujaadiki bwebe. Dyabulu mmwele buteyi bwònsò bwa budimu bùdiye mwa kwikala naabu abu, bwa . . . Yèyè mmuseeswishanganyi. Ne Yesu mmutwàmbile, mu Maataayi 24, mùvwà dituku ditùdi ne mwoyi edi mwa kwikala, dituku ditambe kwikala dya diseeswisha dya kacya, “mutambe kufwanangana mu mushindu wa mufwanyine kuseeswisha too ne Basungula baa Nzambi mene bu ne bìvwa mwa kwenzeka ne yèyè abaseeswishe.”

¹⁷ Mpindyewu twànjàayi kufwanyikija ndambu wa Mifundu, anyi biprofeta byamba mu Bible, bwa leelu ewu, nenku tucifwanyikije ne dituku ditùdi ne mwoyi edi.

¹⁸ Mu Timote Mwibìdi 3, tudi tuyiila eci ne, muprofeta mmwambe, ne: “Bìvwa mwa kwenzeka mu matuku aa ne, bantu bàvwa mwa kwikala bapape mitu, badìbàndishi, banangi baa bisankasanka kutamba kwikala banangi baa Nzambi.” Anji fwanyikijaayi aci mpindyewu, bwa katanci kakese cyanaana. Katwakwikala. . . Netucyàmbè anu mu cikoso cyanaana, bu mutùdi katuyi ne dìbà dyàbùngì dya kukenketa byònsò abi bu mùvwàbi bikengela bwa twètù kubyangata mu mushindu mujaalame; kadi bìdi anu bwa kubitookesha cyanaana, bwa nwàpetakù mwa kubimona ne kubilonga panwikalà baalukile ku mèènù. “Bapape mitu, badìbàndishi, banangi baa bisankasanka kutamba kwikala banangi baa Nzambi; kabayi bakumbaja mèyi adibo bamba, basongwedyanganyi, kabayi ne kudikanda, ne badyombodi baa aba bàdi bìmpè.” “Mpindyewu Nyuma mmwambe patooke ne bintu ebi nebyenzeke mu matuku a ndekeelu.” Awu’s mmatuku aa, àdi ciprofeta ciikàle cyàmbila.

¹⁹ Mpindyewu tudi tubala kabidi, mu Bwakabuulwiba . . . 14, Bwakabuulwibwa 3.14’s we, eyowa, Cikondo cya Ekeleeziya wa Laodikiya, mùvwà ekeleeziya mwa kwikala mu dituku dya ndekeelu edi. Nenku ùvwa mwa kwikala, mùdiYe wamba ne: “Ùvwa mwa kwikala musòmbè bu mukaji mukamba ne kayi dijinga ne cintu nansha cimwe to. Ùvwa—ùvwa mubanji, ne mudivudijile bintu; kadi kayi mumanye ne mmupele, mwena dikenga, mukengeledi wa luse, mpofo, ne butaka, ne kayi mucimanye to.” Nenku. . . Mpindyewu, vulukaayi ne, Yèyè udi wakula ne ekeleeziya wa eci cikondo, “mukengeledi wa

luse, mpofu, butaka, kadi kayi mucimanye to.” Katupa kaa ndekeelu kaa cyambilu aku, Dìyì dya ndekeelu adi, s’ki didi dicivwija cya cikòka ntema bikole. Badi bôbò beela meeji mùdìbo buujiibwe tente ne Nyuma bilenga be, mùkaadìbo bônso badilongolole. Cikondo cya Ekeleeziya wa Laodikiya’s n’Cikondo cya Ekeleeziya wa beena Mpenta, bwalu ki cikondo cya ndekeelu cya ekeleeziya. Luther uvwa ne wende mukenji; Wesley uvwa ne wende mukenji; ne beena Mpenta bavwa ne wabo mukenji.

²⁰ Kabidi, m’Mwambe, ne: “Bwalu wêwè udi civumvu, kuyi nî nne luuya anyi ne mashika,” masaluka a pambelupambelu, didifwanyikijila dya mu meeji dya Evanjeeliyo; “bwalu,” mùdìYe mwambe, “wêwè nyawu udi mushindu awu, Nénkutwilè mukana Mwanyi.” Mu ngaakwilu mukwabo, mbiMwendeshe ku mwoyi pa kumona ekeleeziya mu ngiikadilu awu.

²¹ Nenku, vulukaayi ne, bôbò mbàvwà baMutwile mukana; nenku Yèyè ukaavwa usanganyiibwa pambelu paa ekeleeziya, ùteeta bwa kwalukila munda, mu Cikondo cya bwalu bukole cya Ekeleeziya wa Laodikiya aci.

²² Nzambi wa buloba ebu leelu ewu, muntu wa pa buloba ebu udibo bakuukwila leelu ewu awu, n’Sataana. Ne bantu mbapange kumanya ne udibo bakuukwila awu n’Sataana, kadi Sataana ngudi udifwanyikija bu ne ng’ekeleeziya, nwamonu’s, bu ne ng’ekeleeziya. Badi bakuukwila Sataana, beela meeji ne badi bakuukwila Nzambi kupicila ku ekeleeziya, kadi wôwò awu’s ki mushindu wùdì Sataana mucyènzè.

“Kakaa,” mùdì wêwè wamba, “kadi anji indilabi kakese; twètù’s tutu tuiyisha Dìyì.”

²³ Alujaayi mèsù ku kubala kwanyi mwab’ewu, diloolo edi. Sataana mwine awu’s nyèyè wàkayiisha Eva Dìyì, wa nzànzànzà awu ne: “Nzambi mmwambe,” nwamonu’s.

²⁴ Dyumvwija dibi dya katupa kaa Mufundu kàdì kàngaciibwà bwa dituku edi adi’s ndidì ne bwalu. Yèyè neakufikishe ku dimanya ne byônso byàkenzà Yesu bìvwa bìmpè bya menemene. Yèyè neakufikishe ku dimanya ne byônso byàkenzà Mòsà bìvwa bìmpè bya menemene. Kadi paudi wangata milayi yakafilaBo bwa dituku edi, dîbà adi Aci civwa cyangaciibwa bwa cikondo cikwabo. Aci’s ki cyônso cìdìye ne cya kwenza, nwamonu’s, nkufikisha bantu ku diCiitabuuja mushindu awu, nenku—nenku ki cyônso cìdìku ncyôci aci. Bwalu: “Kanwena mwa kumushilaKu Dìyì nansha dimwe, anyi kusakidilaKu dîyì nansha dimwe.” Kadi’s ki cìdìye yèyè wenza.

²⁵ Bantu, bakuukwila Sataana kabayi bamanye to, beela meeji ne Nzambi ngudibo bakuukwila; mùdìbo batudimwiye kùdì ciprofeta, mu Tesalonika Mwibidì. Ne, twànji anu kubalaayi cyôci aci, Tesalonika Mwibidì, nshapita mwi2. Twànjàayi anu kucyangata katanci kakese, bu mèmè mwa kwikala ne

mushindu, katuyi tujanguluka to. Ndi muswe kubala cyôci aci. Anu, ngeela meeji, Tesalonika Mwibîdi awu. Ndi ne Mufundu awu kaaba aka. Mu . . . Mwibîdi.

Mpindyewu tudi tunusengeleela, bânà beetu, bwa dilwa dya Mukalenge Yesu awu . . . ne bwa didisangisha adi kùdiye,

²⁶ Mpindyewu, nwamonu's, "dilwa dya Mukalenge, ne didisangisha kùdiYe," pàasangishà Nzambi cisamba Cyende kùdiYe mu matuku a ndekeelu. "Didisangisha dya cisamba kùdi Mukalenge," kî nkùdi ekeleeziya to, "kùdi Mukalenge; didisangisha kùdiYe."

Bwa nwênù kanuzakajiibu lukasa mu meeji enu, anyi . . . batakishibwe mu meeji—batakishibwe mu meeji, nansha kùdi nyuma, anyi . . . diyi, anyi kùdi mukanda mufunda byenze bu ne mmufumine kutùdi, bu ne . . . dituku dya Mukalenge dikaadi pabwîpi to.

Muntu nansha umwe kanuseeswishiku to nansha bya munyi; bwalu dituku adi kadyakulwa, pàdiku kakuyi kwanji kulwa kupidya kwa diitabuuja dyambedi, ne muntu wa mpekaatu awu ("muntu wa mpekaatu," tangilaayi numone cidiye mpindyewu), muntu wa mpekaatu awu kayi mwanji kusokolodiibwa, mwânà wa kabutu awu, (awu's ùvwa n'Yudaase, nwamonu's),

Udi ukândameena ne ùdizangika kumutu kwa cyônsò cidibo babiikila ne Nzambi aci, anyi cidibo bakuukwila, mu mushindu wa ne yêyè bu Nzambi mmusômbe mu ntempelu wa Nzambi, udileeya ne yêyè ki Nzambi.

²⁷ Diseeswishangana dya ekeleeziya wa leelu ewu adi's! Nwamonu's, "mwânà wa kabutu awu," dyabulu. "Mwânà wa kabutu awu," dyabulu. Dîbà adi, bantu bakuukwila Sataana mu dituku edi, beela meeji ne udibo bakuukwila n'Nzambi. Kadi badi bamukuukwidila ku twitabaayi kampanda, mangumba ne twitabaayi bikwatakaja kùdi muntu bìdi bikafikishe bantu too ne ku diseeswishibwa dinene dîdi baa pa buloba kacya kabayiku banji kumanya to. Dîyi dya Nzambi, dîdi dilaya bwa dituku edi, nansha diyishibwe ne dishindikibwe bishi, bôbò kabeena anu baswe kuDiitabuuja to. KabaakuDiitabuuja to.

²⁸ Dîbà adi mbwà cinyi? Twêtù's tudi tudikonka ne mbwà cinyi. Bwa cinyi kacylenea . . . bwa cinyi kî mbaswe kuDiitabuuja? Pàakambà Nzambi ne Yêyè uvwa mwa kwenza cintu kampanda, ne Yêyè ucyenza, kadi bôbò badi anu bacyela nyima ne badisaka kule naaci. Anu mùvwà Eva mumanye ne cìvwà Nzambi mwambe aci, Nzambi uvwa mwa kucyenza; kadi yêyè kucyela nyima, bwa kuteelejaye cìvwà yêyè awu ne cya kwamba.

²⁹ Vulukaayi anu ne, mu bikwabo bikondo, cìvwa misangu yônsò anu cintu cimwecimwe aci. Mu cikondo ne cikondo

cyônsò, bìvwa misangu yônsò anu Sataana mwikàle uteeta bwa kubanyangakajila Dìyì adi, ubafikisha ku dimona cikondo cikwabo kampanda.

³⁰ Tangilaayi, pàakalwà Yesu, nwamonu's, Sataana uvwa usanganyiibwa mu musumbà wa balongeshi, ne baalaabi ne baakwidi baa beena Yuda abu, ùteeta bwa kubambila bwa kulamabo mikenji ya Mòsà, pàvwàbi ne Dìyì diine divwa dyambe ne mu dituku adi Mwànà wa muntu uvwa mwa kubuuludiibwa, nwamonu's, ne Yèyè uvwa mwa kudibuulula Yèyè mwine. Pa nanku bôbò bàvwa bàteeta, bu mùvwàbo anu babalame bu batendeleedi amu, ne pa mikenji ya Mòsà. . . Nudi numona cyakenzaye anyi? Yèyè uvwa uteeta bwa kubambila ne: "Katupa kaa Dìyì aku kadi anu kaa cya bushuwa mememene, kadi ewu Muntu kî mmenemene mwine Muntu awu to." Nudi numona mùdiye museeswishanganyi anyi? Ki dyôdi diine dituku dya cya bushuwa dya diseeswishangana adi.

³¹ Bikaadi byenzekenzeke, ne bidi byenzeka mpindyewu ne, Sataana udi munkaci mwa kushindamija bukalenge bwende pa buloba. Ki bwa cinyi menemene yèyè udi munkaci mwa kucyenza, bwalu mmuswe kushindamija bukalenge bwende bwa sungasunga.

³² Bu mùdi mwena kantu ku byanza, udi kayi mwena Kilisto to, yèyè nealukakaje màyelè ônsò adiye pende mwa kulukakaja awu bwa kukufikisha ku dimona cintu kampanda mu mushindu mubi. Yèyè ne—ne kiipacila kampanda ne makàsà adiye udipetelamu mu dikufikisha ku dyanza dya cyôci aci, mu dikufikisha ku dicimona mu mushindu awu, neakuleeje cyônsò cidiye mwa kukuleeja aci, cibì ùkulama kule ne bulelela bwa cintu, bwalu yèyè udi ne njiyà anu bwende yèyè nkaayende. Nansha yèyè udinga ne wibila bishi, ne bikwabo byônsò, yèyè udi upetamu makàsà ende yèyè nkaayende.

³³ Nenku ki bwa cinyi Sataana mmwenze cyôci eci. Ne yèyè mmukwacile mudimu ku mudimu wa bwambi bwa kucyenzaye, bu mùdi Nzambi mulaye ne neàcyènzè. Mpindyewu, yèyè wakabanga ne diseeswishangana dya mu butendeleedi mu Edena, ne wàkatungunuka kubangila anu piine apu.

³⁴ Kî nku dyanza dya musumbà wa ba-communistes to. Ba-communistes kabeena ne cya dyanza mu bwalu ebu to. Mmu ekeleeziya, ki munùdi ne cya kutabaleela, nwamonu's. Ba-communistes kî mbôbò—kî mbôbò bàvwà mwa kuseeswisha Basungula mene to. Ekeleeziya nyèyè wàseeswisha Basungula mene, nwamonu's. Kî mba-communistes to; tudi bamanye ne bôbò bàtu bavila Nzambi, ne mbafwilakanyi ne Kilisto, ncyà bushuwa ne ki cidìbo, bwa kwanji kwamba's, kadi kî mbôbò bàdi mufwilakanyi ne Kilisto awu to. Mufwilakanyi ne Kilisto yèyè mmutendeleedi, mutendeleedi wa dikema, ne ùdi mwa kuteela Mufundu, ne kwenza bwa Wùmweka mutooke tòò.

35 Bu mwàkenzà Sataana ku cibangidilu kwaka, wàkatèèla kantu ne kantu anu mu kòkò too ne ku ndekeelu ne: “Nzambi mmwambe ne: ‘Wêwè kùdi ku mucu wònsò wa mu budimi.’” Nwamonu’s, yèyè uWuteela anu mu wòwò bitooke tòò.

36 Mukaji kwambaye ne: “Eyowa, tudi mwa kudya ku mici yònsò ya mu budimi, kadi kùdi mucu kampana munkaci mwa budimi wùdi Nzambi mwambe ne katuwudi to, bwalu, nansha mene kuwulenga; bwalu, dituku ditwawudya, dituku adi netufwe.”

37 Yèyè kwamba ne: “Kaa, ncyà bushuwa ne kanwakufwa to. Kadi lekela nkwambile cìdì Nzambi mwambidile cyôci eci, mbwalu...” Nwamonu’s, mpindyewu yèyè wàkenza cinyi? Wàkatèèla Bulelela ebu, nudi numona’s. Kwambaye ne: “Necinutabeeje mèsù, ne necinujingulwile maalu mîmpè ne maalu mabi. Nenwìkalè mùdi Nzambi dîbà adi, bu nwènù mwa kucyenza.”

38 Ki cidiye muswe kwenza ncyôci aci menemene, ne cidi anu cintu cimwecimwe aci menemene cidiye uteeta kwenza leelu ewu. Nkwenzeke diseeswisha dya mu ntendeleelu kacya anu ku cibangidilu ku Edena kwaka, ne didi dyenzeka kacya anu piine apu. Mu cikondo cya Adama, civwa ndiseeswisha. Mu cikondo cya Noa, civwa ndiseeswisha. Mu cikondo cya Yesu, civwa ncintu cimwecimwe aci. Ne patùdi twakulangana apa ncintu cimwecimwe aci, mushindu wumwewumwe awu, diseeswisha dya mu ntendeleelu!

39 Mpindyewu, tumonaayi bîmpè buloba, pàvwà Nzambi mwikàlepù ne bukontononyi. Mpindyewu, pàvwà Nzambi ne bukontononyi bwa buloba . . .mwikàle naabu mu bukontononyi Bwende. Pashiishe, pààkangatà Sataana bukontononyi, ku dibèngà dya Dîyì dya Nzambi. Musangu kampana Nzambi uvwa ne buloba mu bukontononyi Bwende. Yèyè wakabuteeka mu mpoko wabu. Yèyè wakabuteeka, ùbwèndesha. KwenzaYe kantu ne kantu, mwikàle naabu mu bukontononyi Bwende. Mpindyewu netufwanyikije aci ne paanyima paa Sataana mumane kubwangata mu bukontononyi bwende.

40 Mpindyewu, byakangata Nzambi bidimu binunu bisambombo. KabyakaMwangata mukùngùlù bule abu to, kadi Yèyè ngwàkangata mukùngùlù bule abu. Bidimu binunu bisambombo, bwalu tudi bayiile ne “dituku dimwe mu Dyulu didi bidimu cinunu pa buloba,” nenku bìvwa mbidimu binunu bisambombo, anyi matuku asambombo àvwà Nzambi mwibake buloba. Nenku, byakangata Nzambi bidimu binunu bisambombo bwa kubushindamija, kukunapu mamiinu mîmpè ne kuvudija cintu ne cintu bilondeshile mushindu wàci. Cintu ne cintu cidi ne cya kuvulangana bilondeshile mushindu wàci. Mamiinu Ende ónsò àvwa mîmpè, ne pa nanku àvwa ne cya

kuvulangana bilondeshile mushindu wàwù. Nzambi wakangata bidimu binunu bisambombo.

⁴¹ Ndekeelu wa byònsò, paakamanaYe kubyenza byònsò, ki ndekeelu wa byònsò twètù...ndekeelu wa byònsò kulwaku ciimamwëndè wa bukalenge, cya buloba, mu citupa cilenga cya dikema ciikàle cisanganyibwa ku esete wa Edena, cibiikidiibwa ne mbudimi bwa Edena. Nzambi wakenzela ciimamwëndè wa bukalenge cya buloba mu budimi bwa Edena, mu Ejipitu, anu lwà mundekeelu menemene mwa esete wa budimi ki mùvwà ciimamwëndè wa bukalenge cisanganyibwa.

⁴² Nenku kumutu kwa mwaba wònsò awu, Yèyè wakateeka Mwan'Ende wa balume ne mukaj'a mwan'Ende, kumutu kwa byònsò abi. Ncya bushuwa. Ki cyàkenzà Nzambi ncyôci aci. KubateekaYe ne bukontononyi mu kaabujima. Bàvwa mwa kwakula ne mpeepele, ne yôyi yìvwa mwa kulekela dituuta. Bàvwa mwa kwakula ne mucu, ne wówò wùvwa mwa kutentemuka wùmuka *apa wùya pààpa*.

⁴³ Nyama wa ntambwe ne mbwa wa diitu bìvwa bidiila kaaba kamwe, ne mwànà wa mukooko uvwa ulaala ku luseke lwàbi. Kakuvwaku ubi to. Cìvwa ditalala dipwangane, dipetangana dipwangane, kantu ne kantu mu bupwangane, ne piine apu mpàvwà Nzambi mwikàle ne buloba mu bukontononyi Bwende. Nenku bwòbù...monaayi, Yèyè uvwa ne Bwende—Yèyè uvwa ne buloba Bwende, Yèyè uvwa mubuteeke bwònsò mu mudimu. KwenzaYe bwa bintu byònsò bilwe. Byònsò bìvwa bidya bisoosa; kakuyi cintu nansha cimwe cifwa to, kakuyi cintu nansha cimwe mwa kunyangakajiiwbaku to, cintu nansha cimwe kacyi mwa kuvwijiwbaku cibi to. Cintu nansha cimwe...Bìvwa anu bipwangane menemene.

⁴⁴ Nenku kumutu kwabi byònsò, kuteekaYe bàna Bende bananga abu, mwan'Ende wa balume ne mwan'Ende wa bakaji, mulume ne mukajende, bwa kwikalabo babikontonona.

⁴⁵ Nzambi uvwa musankishiibwe bikole! “Ki Yèyè kwikisha ku midimu Yende yònsò, pa dituku dya mwandamutekete,” ne kujidilaYe nsabatu ewu wa dituku dya mwandamutekete Bwende Yèyè.

⁴⁶ Bwalu, Nzambi wakabubandila bwònsò, paanyima paa Yèyè mumane kwenza bidimu binunu bisambombo ku dibufwimba ne ku dibulongolola, ku dyenza bwa kulwabu ku diikalaku; nenku Yèyè kjuuula mikuna, ne kwenza ne mabwe mengulula kùdì tupya twa mwinshi mwa buloba abandishe mikuna ayi, ne bintu byàkenzekà mu difùkuka adi abi; kubyumisha, ne kubilongolola mushindu wàkabyènzàYe awu. Nenku cìvwa mwaba mulenga wa dikema.

⁴⁷ Kakùvwakù cintu nansha cimwe bu cyôci aci to, mpaladiizo minene ya Nzambi ayi! Ne binyama binènenene bya kalekale abi, ne bikwabo byònsò, byenda bidikokapu, ne nyama ya minene ayi;

kakùyikù dyenzelangana dya bibi mu byòbi to. Bìvwa ne kalolo anu bu kàà kampuusu kànà. Kabìvwakù ne cintu nansha cimwe to; kakùyì—kakùyì màsaamà, kakùyì tunyinganyinga to; kakùyì kîshì kaa disaamà nansha kamwe pa buloba to. Kaa, mwaba kaayipu's we!

⁴⁸ Nyuunyi minene yibuuka yumuka ku ewu mucì yìya ku mukwabo, ne Adama uvwa mwa kuyibiikila mu mènà ààyì, ne yòyì yivwa mwa kubuuka ne kumwikila pa makaaya ne—ne kumudidila ku maci. Nenku, kaa, mwaba bulengawu kaayi wùvwà Nzambi naawu's we!

⁴⁹ Nenku pashiishe kwenzaYe cimwe cya ku byambiibwa Byende cyangacila ku Mubidi Wende Yèyè mwine. Nzambi ùtu ne byambiibwa mu Mubidi Wende.

⁵⁰ Bu mùdi wèwè, udi cyambiibwa cya tatwèbè. Nenku, nudi numona's, wèwè uvwa munda mwa kakwèndè wa kakwèndè wa kakwèbè. Kadi, mu cyòcì aci, twàmbè ne, netuye naaci nanku too ne ku bu mùdi wèwè ne tatwèbè. Mpindyewu, wèwè kuvwa mumanye cintu nansha cimwe to pauvwa munda mwa tatwèbè apu. Mutoloku wa mwoyi wùtu wufumina kùdì mulume. Mulume ngudi ne kabulu kaa mashi; mukaji udi yèyè ne—ne diyì; mpindyewu, ki bwa cinyi, kabulu kaa mashi aku kadi ne mwoyi munda mwàkù. Nenku, dîbà adi, pauvwa munda mwa tatwèbè apu, mu bushuwa bwa bwalu wèwè kuvwa mumanye cintu nansha cimwe pa bwalu abu to. Kadi, pààbi, maalu a mamanya ne Dìyì dya Nzambi bìdi bijaadika ne wèwè uvwa munda mwa tatwèbè, kadi kuvwa mumanye cintu nansha cimwe pa bwalu abu to.

⁵¹ Kadi dîbà adi tatwèbè uvwa ne dijinga dinene dya kukumanya. Nenku ku dipetangana mu disangila ne mamwèbè, dîbà adi wèwè kufikishiibwa ku dimanyika kùdì tatwèbè. Mpindyewu, wèwè udi cyambiibwa cya tatwèbè. Udi mumufwane, ne udi ne bitupa bya mubidi bìdì bifwanangane ne tatwèbè.

⁵² Mpindyewu, mushindu awu ngùvwà Nzambi ku cibangidilu. Mwànà yònsò wa balume wa Nzambi ne mwànà yònsò wa bakaji wa Nzambi uvwa munda mwa Nzambi ku cibangidilu. Wèwè kwèna ucivuluka mpindyewu to, kadi uvwamu. Yèyè uvwa mucimanye. Nenku Yèyè uvwa muswe bwa nwènù kulwa mu mushindu wà ne bwa Yèyè wàmòna mwa kunulenga, kwakula neenu ne kununanga, ne kunulabulaku ku cyanza.

⁵³ Wèwè kùtukù muswe bwa mwaneebe mulela wa balume . . . Kî ndituku dya butumbi anyi pìikalà mwaneebe wa balume mwa kulwa kumbelu kwebè ne kusòmba ku meesa? Pàdiye walukila ufumina ku mwalu wa mvita, anyi cintu cikwabo kampanda, ne mputa ya milengu pambidi pajima, mushindu wuwalongolola didya, ushebeya kànà kaa ngombe kaa maanyi, anyi nì ncinyi cikwabo cyònsò, ne umwipikila! Yèyè mmusunya

ne mashi byebe wêwè mwine, ne yêyè uvwa munda mwebe. Wêwè kuvwa mumumanye piine apu to, kadi uvwa mumanye ne yêyè uvwaku.

⁵⁴ Nenku Nzambi uvwa mumanye ne twêtù aba netwikalé kaaba aka, kadi ki Yêyè kututeeka mu mubidi bwa twamona mwa kulengiibwa. Bwa kumonaYe mwa kulengangana, Yêyè wakalwa umwe wetu paakalwaYe Yesu Kilisto, Mwânà wa Nzambi Yêyè mwine, kaabujima kaa dimweshiibwa dya Nzambi. Ki bwa cinyi cyôci aci ncìvwà kiipacila kaa Nzambi, bwa kuleeja patooke byambiibwa Byende mu bwobumwe.

⁵⁵ Mémè pâmvwà munda mwa taatù wanyi, ncìvwà mumanye cintu nansha cimwe pa bwalu abu to. Kadi pângààlu mwanende ne mulediibwe kùdiye, mvwa cyambiibwa, citupa cya taatù wanyi. Ne wêwè udi citupa cya tatwébè.

⁵⁶ Nenku twêtù bu bàrà baa Nzambi, tudi citupa cya cyambiibwa cya Nzambi cìvwà munda Mwende, civwijìlbwe mubidi mwakavwijiibwaYe mubidi amu, bwa twamona mwa kubwela mu bwobumwe muntu ne mukwende, bu dikù dya Nzambi pa buloba. Nenku aci ki cìvwà kiipacila kaa Nzambi ku cibangidilu. Eyowa's, mukalenge. Ki cìvwà Nzambi muswe ku cibangidilu ncyôci aci.

⁵⁷ Yêyè uvwa ne bintu byônsò mu bukontononyi. Ki kuteekaYe muntu mu budimi bwa Edena, mu budishikaminyi bwa disungula; wàmba ne: "Mwan'Aanyi wa balume, mbyebe wêwè."

⁵⁸ Mwaba mulenga kaayipu's we! Nzambi wakasankishiibwa bikole, mu mushindu wa ne Yêyè wakaalukila e kwikisha ku midimu Yende yônsò. Muci wônsò kacya kawuvwaku yipatula mèbà ne mingonga to. Mbèèlèbeele kacya kayivwaku yikwama ku mucu wa mèbà to. Byônsò bìvwa bipwangane. Mamiinu ônsò àvwa mapwangane. Byônsò bìvwa mu ngiikadilu mupwangane.

⁵⁹ Pashiishe pàakayà Nzambi bwa kwangataku kaadiikisha kakese, mwena lukuna Wende wakadifindamu ne diseeswisha, ne wakabyangata ku bukookeshi, ku dyumvwija dya bàrà Bende ndongamu Wende awu bibi. Pààbi, Yêyè uvwa muteeke dyeyemena mu mwan'Ende Yêyè mwine awu; anu mùdì wêwè uteeka dyeyemena mu mwaneebe wa bakaji pàdiye upatuka bufuku ne muntu mulume; mùdì uteeka dyeyemena mu mwaneebe wa balume pàdìbi bikengela bwa kupatukaye ne nsongaalume munù wa maala anyi ne nsongaalume munù wa mfwanka. Nwamonu's, Yêyè uvwa muteeke dyeyemena mu mwan'Ende wa balume, bwa ne yêyè kavwa mwa kwenza cintu cya cibi nansha cimwe to, ne yêyè uvwa mwa kulama Dìyì dyônsò òvwàYe mwambe. Kadi mwena lukuna wakadifindamu; byenze bu mùdì nkozongò wa nsuki mifinunuja ne mafuta awu uvwa mufwanyine kupatuka ne mwaneebe wa bakaji ne uditwala bibi; anyi—anyi mukaji kampanda wa mufwanyine kwangata, kupatuka ne mwaneebe wa balume, nenku cintu cimwecimwe

aci's. Nwamonu's, kudifindayemu. Mwena lukuna wa Nzambi wakadifindamu ne wakumvwija Dìyì bibi kùdì Eva.

⁶⁰ Mpindyewu, yêyè, ku cibula eci, yêyè mmukwate ku bukontononyi ne mwangate budimi bwa Edena mu cyanza, yêyè mwine. Yêyè wakabukwata ku bukontononyi. Nenu mpindyewu yêyè mmwangate bidimu binunu bisambombo bya bukookeshi bwa diseeswisha; mwikàle useeswisha bantu, bânà baa Nzambi, anu mwàkacyènzàye dîbà adi amu. Bwalu, bàvwa bateekiibwe pa cishimikidi cya budishikaminyi bwa disungula, bwa kwenzabo maalu mu mushindu wònsò wùvwàbo bàjinga kwenza awu. Nenu mwikàle wítabuujja ne bóbò bàvwa mwa kwenza maalu mu mushindu mujaalame, anyi mwikàle wèyemena ne bàvwa mwa kwenza maalu mu mushindu mujaalame, pashiishe kulwabo kwenza cyenzedi cibi, ne kupaanyishabo makenji abo a bwanaabute, bu mwàkenzà Esawu, ku maalu a pa buloba. Ki Sataana kucicimunaye, ne kucikwataye ku bukookeshi bwende. Nenu yêyè mmwangate bidimu binunu bisambombo bwa kwibaka wendè Edena, mùvwà Nzambi mwangate bidimu binunu bisambombo bwa kujikija Wendè Edena awu. Nenu ku diseeswisha, diseeswisha dya Dìyì, anyi dya bantu, yêyè mmushindamije mpindyewu wendè Edena wa sungasunga pa buloba, mu mpekaatu.

⁶¹ Edena wa Nzambi wakashindamijiibwa mu bwakane. Edena wa Sataana yêyè mmushindamijiibwe mu mpekaatu, bwalu yêyè Sataana udi mpekaatu. Nzambi udi bwakane, ne bukalenge bwa Nzambi wakashindamijiibwa mu bwakane, ne ditalala, ne Mwoyi. Kadi dishindamija dya Sataana didi dyòdì mu mpekaatu, ne mpekaatu wa butendeleedi.

⁶² Monaayi mwakaseeswishanganaye, diseeswisha dyende, mwakambaye ne yêyè neénzè. Yêyè wakalaya bwa kwenza cyòci eci. Kùdikù muntu uvwa mumanye aci anyi? Tubuululaayi mu Yeshaayi, panwikalà baswe yimwè ya ku Mifundu eyi. Bu nwènù mwa . . . Bivwa bikengela bwa mèmè kuteelaku yàbùngì ya ku Yòyì's, ngeela meeki. Tubuululaayi mu Yeshaayi nshapita wa 14, katanci kakese cyanaana, bwa tumonaayi anu cidì Sataana mwambe kaaba aka, katanci kakese cyanaana. Mu Yeshaayi 14, netucibale, nenu tangilaayi cidì mulumyana ewu mwenze. Mu Yeshaayi 14, tubangila ku mvensa wa 12.

Mushindu mwine wùdì mukuluke mu dyulu, Éyì Lusifere wa yààya, mwànà wa balume wa lunkèèlu! Mushindu mwine wùdì muupudiibwe panshi, wèwè mwine uvwa mutekeshe matunga awu!

Bwalu wèwè udi mwambe munda mwa mwoyi webe ne: Nèmbandè mu dyulu, nènzangikè nkwasà wanyi wa butumbi kumutu kwa mitooto (mbànà baa balume abu), mitooto ya Nzambi; ne nènsembè kabidi pa mukuna wa disangisha, . . . ku luseke lwa ku nord;

Nenku *nêmbandè kumutu kwa myaba mitumbuke ya mavuba; ne nêmfwananganè ne Mutambe bunene wa mu dyulu.*

⁶³ Mpindyewu fwanyikijaayaaku aci kaaba aka ne Mifundu yetu mikwabo ya mu Tesalonika, ya kukaadi katanci eyi, mùdìye mwambe ne: “Yèyè mmusòmbe mu ntempelu wa Nzambi, udizangika yèyè mwine kumutu kwa cyònsò cidìbo babiikila ne Nzambi, mu mushindu wa ne yèyè bu Nzambi akuukudiibwe bu Nzambi pa buloba.”

⁶⁴ Ki nzambi wa buloba ebu ùmvwà munuyiishe bwalu bwende mu dyalumingu dyàshàadi edi awu. S’ki yèyè ewu leelu ewu mu diseeswishangana, mu dîbà dya njuwu mikole edi, cikondo cya cikwacisha bwòwà citùdi ne mwoyi eci. Ncikondo cya citambe kwikala cya butumbi ku bikondo byònsò, bwalu tudi cyakabidi kumpala kwetu ne Bukalenge bunene bwa bidimu cinunu; tudi cyakabidi kumpala kwetu ne Edena. Kadi anu ku cikondo eci mene, diseeswishangana dyònswàdyònsò ne dîyelè ne dîyelè dyònsò bikaadiyeku mukwatekwate naabi mudimu ne bikaadiyeku mupetepete mushindu wa kuseeswishangana naabi abi, mmubikungwije byònsò abi ne mudivwije yèyè mwine mukole wa nyeke; ne mmutuuluke panshi apa byenze bu ne n’Nzambi, ne mmuditeeke pa kaaba kaa Nzambi; mutendeleedi, ne mumanye mwa kuteela Mufundu ne mwa kukwambila Mufundu, anu mwakambila Sataana Eva mu budimi bwa Edena amu. Kadi ùshiya katupa kaaWu kamwe, ki cyònsò cidìye ne cya kwenza, wènza kaaba aku mùdi kaacintu kampanda kapangika, mùdi dilongesha dya dyabulu dya lulengu mwa kupongolokela, cyenze mùdi Kasengulu kaa muntu udi wela meeji katùvwà twamba diloolo adi aku.

⁶⁵ Mpindyewu, yèyè mmwambe ne ùvwa mwa kudizangika kumutu kwa Mutambe bunene wa mu Dyulu; ùvwa mwa kubànda kumutu kwa mavuba ne mitooto, ne ùvwa mwa kasòmbakù bu Nzambi, ne kwikala kumutu kwa Mutambe bunene wa mu Dyulu. Ne yèyè’s mmutuute dyakalenga pa kukumbaja kwa mikanu yende ayi. Ncya bushuwa ne yèyè mmutuute dyakalenga dya dikèmesha pa kukumbaja kwa mikanu yende ayi, mùdi bantu bamulekele ùfila tubingila bwa kuumvwija, mu cikondo ne cikondo cyònsò, mùdi Dìyì dilaya dya Nzambi kadiyi ne mushinga kùdi baa mu cikondo aci. Mushindu awu menemene ngùdìye mucyènzè. Mu cikondo ne cikondo cyònsò, yèyè uvwa ùfila tubingila bwa kuumvwija mùdiDi kadiyi ne mushinga.

⁶⁶ Mu matuku a Noa, yèyè wakumvwija mùvwàbi kabiyiku mwa kwenzeka to bwa mvula kulokaye ufumina mu dyulu, bwalu, “kakwenaku mvula muulu mwamwa to.” Evanjeeliyo wende munene wa maalu a mamanya uvwaye muyiishe mu budimi bwa Edena awu’s! Yèyè uvwa mwa kutuma byamu kampanda ku ngondo ne kujaadika ne kakwenaku mutaleela

muulu mwamwa to. Kadi Nzambi uvwa mwambe ne kùvwa mwa kuloka mvula. Kadi Sataana wakatuuta dyakalenga, ne wakeela lulengu mu mitu ya bantu, ku dikebulula dya mu maalu a mamanya, ne, “kacivwaku cifwanyine kwenzeka to.” Kadi’s cyakenzeka. Nzambi wakamba ne civwa mwa kwenzeka, ne cyakenzeka. Yèyè wakacyenza.

⁶⁷ Mpindyewu, mu matuku a—a Yesu, yèyè wakenza cintu anu cyôci cimwecimwe aci. Wàkeela cyakabidi lulengu mu mitu yabo ku diseeswisha, nwamonu’s, umvwija Dîyî bibi. “Wèwè ní udi Mwânà wa Nzambi, mpindyewu enzabi bwa mmone Wèwè wenza cintu kampanda pa bwalu abu.”

⁶⁸ Yesu kaakamwenzelaku bikàsà to. Yèyè kaakacyenzaku to. Nzambi kî mmwenji wa bikàsà to. Yèyè kî mmwenzejiibwe bwa kwandamuna ku cyônsò cidî Sataana ukonka nansha. Yèyè uvwa anu... Yesu wakamba ne: “Mhafunde ne: ‘Kwakwikala ne mwoyi... Muntu kaakwikala ne mwoyi anu ku dyâmpà nkaayadi to, kadi ku Dîyî dyônsò didî dipatuka mukana mwa Nzambi.’” Nwamonu’s, kabyakakengela bwa Yèyè kwenza bikàsà to, umwenzela yèyè. Kabyakakengela bwa Yèyè kwenza dyâmpà to. Yèyè uvwa anu mufwanyine kwikala mudyènzè, kadi apu Yèyè nunku’s mmuteeleje dyabulu, nenku kabyakakengela bwa Yèyè kuteeleja dyabulu to.

⁶⁹ Nenku bìdi cyakabidi mpekaatu wa butendeleedi, bu mwakadibi ku cibangidilu amu, bya diseeswisha anu byetu ebi. Nucitangilaayi mpindyewu. Kacyèna anu mpekaatu wetu wa kale wa bwàcyà-bwilà, wa dyenda dya masandi ne dikwacika dya maala, ne diteela dya Dînà dya Nzambi citeelateela ewu to. Aci kî ncyôci to. Bwâlà.

⁷⁰ Nudi bavuluke ne kukaadi bidimu, bààbûngî baa kunùdi mwab’ewu, baa kale abu, nudi bavuluke diyiiisha dîngààkayiiishà adi, dya ne: *Dyediibwa Dya Mâyî Ku Makàsà Ku Cilumbulwidi*. Mukaji wa ndumba, yèyè kaakwediibwa mâyi ku makàsà kuntwaku to. Yèyè mmumanye kuyaayaye. Mukwaciki wa maala yèyè kaakwediibwa mâyi ku makàsà kuntwaku to. Musûmbishi wa maala a kapyà mu musokoko, munàyi wa twarta twa mfranga, mwena mashimi, mwîvi, yèyè kaakwediibwa mâyi ku makàsà to. Kadi, muntu udi wela meeji mùdiye mujaalame awu, ki dyediibwa dya mâyi ku makàsà ndyôdi adi.

⁷¹ Ki yèyè mulumyana awu, udi wamba, ùlwa wàmba ne: “Mukalenge, mêmè ewu ncyênàku muyiishe Evanjeeliyo, ncyênàku mwipate baadémons, mu Dînà Dyebe anyi?”

⁷² Yesu kwambaYe ne: “Umukaayi kunùdi... kûNdi, nwênù beena mudimu baa bubî. Kacya Ncîtu mene munumanyeku to.” Dyediibwa dya mâyi ku makàsà’s ki dyôdi adi, nwamonu’s, diseeswishiiibwa adi.

⁷³ Ki cyôci aci cîndî misangu yônsò... mwaba awu’s ki wùdîbo bangumvwa bibi. Kî mbwena kwamba ne ndi muswe kwikala

mpanganangana to. Ncìtu muswe kwikala mpanganangana to, kadi bidi bikengela ngiikalè ne meeji matooke. Mémè ndi ne Mukenji, ne Wòwò udi ne cya kuya kùdì bantu. Bidi byenza ne biikalè bacyumvwa bibi be munkaci mwa bantu. Badi beela meeji ne mémè ndi mbengangana ne bantu bònsò. Bu bòbòku anu mwa kumanye ne, mémè ndi munange bantu bònsò, ne mwikàle ndyenzeja ne mwanyi mwònsò bwa kubatwadila cìdì Bulelela, anu menemene mùdìBu buteekiibwe pa mwoyi wanyi ne mùdìBu bufundiibwe mu Bible emu. Ne Nzambi udi ujaadika cyòcì aci ne m'Bulelela, pa nanku kakwena cintu cikwabo nansha cimwe cìdì mwa kwenjiibwa pa bìdì bìBùtàngilà to. Pa nanku, bidi ne bòbò badi baCitangile, anyi babènge.

⁷⁴ Nwamonu's, bòbò kî mbaswe kuCimona to, bwalu bakaadi bamane kupaanyisha byònsò, bapaanyishe makenji abo a bwanaabute kùdì bulongolodi kampanda, dingumba kampanda; bwa kuteetabo makenji abo a bwanaabute, bwa kuyabo mu Dyulu biikàle bashindameene pa ntendeleelu kampanda mudilongolwela, mwine amu Sataana mwikàle mfumu wa kantu ne kantu kònsò. Kacya Nzambi kàtukù mwanji kwikala ne ntendeleelu kampanda mudilongolwela to, kacyapu. Nenku badi badipaanyisha mu kaabujima ku cyòcì aci, ne kwòkò nkùdibo, musumbà wa bantu, bumvwija Dìyì ne bamba ne Dìdì diswa kwamba *cikampanda* ne Dìdì diswa kwamba *cikansanga*.

⁷⁵ Nzambi kèna dijinga ne muumvwiji nansha umwe to. Yèyè udi uDyenzela dyumvwija Yèyè mwine. Kèna dijinga ne muntu mukwabo nansha umwe bwa kuMwambilaye mushindu wa kucyenza to. Yèyè mmudishikamine. Yèyè mmwambe mushindu wùvwàYe mwa kucyenza, ne mushindu awu ngùdìYe ne cya kushaala mukwate ku Dìyì Dyende. PaakambaYe ne: "Bimanyinu ebi nebifile bàdì bìtabuuja," anu cyòcì aci ncìvwàYe muswe kwamba. Nì ncinyi cyònsò cyakambaYe ne necyenzeke aci, cyakambaYe ne necyenzeke mu matuku a ndekeelu aa aci, bwa ne Yèyè uvwa mwa kwenza bintu kampanda, kadi Yèyè's mmucyènzè. Kabyena bikengela bwa kukonkaYe muntu nansha umwe bwa ne dîbà dyákumbanyi anyi kî ndyanji kukumbana nansha. Yèyè mmumanye ne tudi dîbà kaayi, ne ndongamu udi cinyi.

⁷⁶ Mpindyewu, Sataana, museeswishanganyi ewu, mùdìbo bamwambe mu Maataayi 24.24, ne diseeswishangana búngì cyanaana. Mpindyewu, tudi tusangana ne ku ndongamu yende yèyè ya evanjeeliyo wa dimanya ayi, dilonga dya tulaasa dya ditambe bwimpè, nsòmbelu wa bukalanga wa mutambe kutumbuka, dishidimuka, ne bikwabo, mmulowe bantu bàdì baswe kukwacila Nzambi mudimu, mukababwinke mu mashimi ende yèyè awu.

⁷⁷ Eva kavwa muswe kwenza cyòcì aci to, kadi yèyè wakamuleeja mushindu wùvwà lungenyi lwàbúngì mu cintu aci. Yèyè kavwa mumanye to; kujingaye bwa kumanya. Kavwa

muumvwe to, kadi kujingaye bwa kuumvwa. Kadi Nzambi uvwa mumwambile bwa kateeci bwa kuumvwa to.

⁷⁸ Mmunyi mûndì mêmè ewu mwa kuumvwa nî ncinyi nî ncinyi cya ku bintu ebi's? Ncyêna mwa kubyumvwa to. Ndi mbiitabuuja. Kabyena bikengela bwa mêmè kubyumvwa to. Nzambi udi diitabuuja, kadi kî ndyumvwa nansha. Tudi twitabuuja anu cyanaana bìdiYe mwambe abi.

⁷⁹ Mpindyewu, fwanyikijaayaaku Edena wa Nzambi ne wa Sataana mpindyewu, paanyima paa bidimu binunu bisambombo bya dinyangakaja dya dyumvwija dilelela dya Dîyì dilaya dya Nzambi bwa cikondo. Tubifwanyikijaayaaku mpindyewu, kadi tumone ne netukoobeke penyi. Anu mwakenzelaye ekeleeziya mu—mu cikondo cya Kilisto amu, mu Yesu, ùteeta bwa kupangisha—kupangisha bânà baa Nzambi baa lulamatu bwa kumanyabo Bulelela. Aci ncyà Nzambi. Nzambi wakateeka bânà Bende panwapa, byambiibwa Byende, bwa kubwelabo Nende mu bwobumwe ku diteeleja dya Dîyì Dyende.

⁸⁰ Kadi bu tatwèbè mwa kukwambila, peebe mwikàle mwânà wa lulamatu kùdi tatwèbè awu, ne yèyè kukwambila ne: “Mwanaanyi, kuyi mu mâyi àa naka to, bwa kuya koowelamu, bwalu mùdi ngandu midyanganyi mu mâyi awu”; kadi mulumyana kampanda ùlwa paanyima, ùkwambila ne: “Bushuwa, mâyi bulengawu mushindu wawa, kamwena ngandu midyanganyi to”? Mpindyewu uwikalà mwa kuteelejila ki nganyi? Wèwè mwikàle mwânà wa balume mushuwashuwale, s'neuteelejile papa webe.

⁸¹ Nenu mwânà wa balume anyi wa bakaji mushuwashuwale wa Nzambi udi uteeka Dîyì dya Nzambi pa kaaba kaa kumpala. Cidì muntu kampanda mukwabo wamba pa bwalu abu nansha ciikàle cinyi, yèyè udi uteeka Dîyì dya Nzambi pa kaaba kaa kumpala. “Mu lupanza mùdi mulungù,” ne yèyè udi uciitabuuja.

⁸² Kwikalà ne diitabuuja mu Dîyì Dyende dyònsò, Mamiinu Ende, kwakatwala Edena wa cijila, wa dinanga, ne Mwoyi wa Cyendeleele. Ki cìvwà Edena wa Nzambi mupatule ncyôci aci, cijila. Nenu kutwalaci Edena wa cijila, wa dinanga, dyumvwa, bupwangane, ne Mwoyi wa Cyendeleele. Ki cidì Nzambi munkaci mwa kukùna ncyôci aci: Dîyì Dyende, Diminu Dyende. Ki cìikalà Ekeleeziya Wende ku ndekeelu ncyôci aci; Neikalè cintu cimwecimwe aci.

⁸³ Monaayi, mmwenenu nyèyè ewu. Kanumupuku mwoyi to. Nêmfikèku dîbà dikwabo kampanda anyi mu Dîyiisha dikwabo kampanda. Kadi, nudi bamanye's, Nzambi wakamba ne: “Diminu dyònsò divulngane bilondeshile mushindu wàdi.” Aci ki dîyì dituma dya Nzambi anyi? Mpindyewu bìdi ne dikwacisha kaayi bwa muyiishi nansha bamwamba ne nganyi, anyi muntu mukwabo kana yònsò ewu, bwa kuteeta kufikisha Dîyì adi ku dyamba cintu cìkwabo cya cyanaana? Nwamonu's,

Dìyì dyònsò dya Nzambi n'Dimiinu. Yesu wakamba nanku ne: “Dimiinu dyakamyaminabo kùdì mummyinyi.” Pa nanku pùikalàbi ne Maako 16 n'Dìyì dya Nzambi, s'neakwame dya mushindu wende. Pùikalàbi ne Maalaki 4 n'Dìyì dya Nzambi, s'neakwame dya mushindu wende. Ne mulayi mukwabo wònsò wùdì ne cya kuvulangana bilondeshile mushindu wàwù.

⁸⁴ Nudi numona's, nudiku numona mùdì Sataana kaaba aka mudibwikile ciseba anyi? Ùdi uteeta kwamba ne: “Kabyena, kabyena nanku to.” Nudi nucyumvwa anyi? Nwamonu's, Sataana udi wamba ne: “Kaa, Aci kî n'cya dituku edi to. Aci, aci—aci cidi . . . Aci cìvwa ncikondo kampanda cikwabo. Aci, aci kaciyena mene cyumvwija aci to.”

⁸⁵ “Dimiinu dyònsò dìdì ne cya kupatuka bilondeshile mushindu wàdì.” Mushindu awu ki wàkashindamijà naawu Nzambi Edena Wende. N'cya bushuwa anyi?

⁸⁶ N'enku's ki cyòcì eci: Mushindu awu ngùdì Nzambi ushindamija naawu Ekeleeziya Wende, Dìyì dyònsò bilondeshile mushindu wàDì! “Muntu kaakwikala ne mwoyi ku dyàmpà nkaayaadi to, kadi ku Dìyì dyònsò dìdì dipatuka mukana mwa Nzambi.”

Nwamonu anyi? Sataana, yèyè neangate cintu kampanda cikwabo, kadi Nzambi wakamba ne: “Dimiinu dyònsò bilondeshile mushindu wàdì.”

⁸⁷ Mulayi wòwò mwambe ne: “Bimanyinu ebi nebifile bàdì bìtabuujà,” mpindyewu ekeleeziya yèyè udi wamba ne: “Shaala wa mu ekeleeziya. Ikàlà wambulula twitabaayi ku mwoyi. Manya kateshismu.”

Kakwenaku bintu bya mushindu awu mu Bible mujima to.

⁸⁸ Kadi Yesu wakamba ne: “Bimanyinu ebi nebifile bàdì bìtabuujà: mu Dìnà Dyanyi bôbò nebiipate baadémons; nebaakule mu myakulu mipyamipya; bôbò bakwate nyoka ne byanza, anyi banwe bintu bìdì bishipangana, kabyakubenzela bwalu to; bôbò batentekela babeedi byanza, babeedi nebasangale.” Muntu kanà yònsò ewu udi nganyi yèyè's bwa kuvila Aci? Nwamonu anyi?

⁸⁹ “Dimiinu dyònsò nedivulangane bilondeshile mushindu wàdì.” Wèwè mwikàle dimiinu dya Nzambi, cyambiibwa, mwànà wa Nzambi, dîbà adi Dìyì dya Nzambi ndikunyiibwe munda mwebe. Nwamonu anyi? Ne pashiishe paudi umvwa Dìyì dya Nzambi ne: “Mikooko Yanyi yidi yumvwa Dìyì Dyanyi; kayaakulonda mwenyi to.” Nudi bacyūmvwè anyi? Dîbà adi, “dimiinu dyònsò dìdì divulangana bilondeshile mushindu wàdì.”

⁹⁰ Mpindyewu tudi tusangana ne, dimiinu dyònsò dìdì divulangana bilondeshile mushindu wàdì, kakūvwakū lufu nansha lukese to mu mupyamupya . . . mu Edena awu amu.

Kakwakwikalaku lufu nansha lukese to mu Edena mupyamupya. Nwamonu's, kamùvwakù cintu cikwabo to, anu cijila, bukezuke, ne Mwoyi wa Cyendelele.

⁹¹ Mpindyewu, ku bupidya ku Dîyi dyònsò dya Nzambi, mbitwale dimiinu dya dipanga cijila mu Edena wa Sataana. Tudi mpindyewu tubwela mu mwaba wùdì Sataana wangata nkwaswa wa butumbi, bu mufwilakanyi ne Kilisto, mu Edena wa—wa pa buloba ebu, Edena wa mpekaatu, ntendeleelu munyangakaja. Yèyè kaakabangila pa ne: “Mêmè ndi Sataana. Mêmè ki mwanjelo munene awu” to. To, kacìvwa pa aci to, kadi pa dinyangakaja dya Dîyi dya Nzambi. Ne mushindu awu ki wakatwalaye bukalenge bwende, mu cikondo ne cikondo cyònsò. Nenku mpindyewu mu cikondo cinene eci cya diseeswisha, yèyè ukaadi pa kwangata nkwaswa wende wa butumbi, ku bantu bende! Yèyè ukaadi mudibàkile Edena wa mamanya a mu mitu, wa bantu balonge tulaasa, wa maalu a mamanya; cya bushuwa, bayiishi baa maalu a mamanya, ekeleeziya wa maalu a mamanya, teoloji wa maalu a mamanya, byònsò mbya maalu a mamanya. Byònsò mbishindameene pa dimanya. Ekeleeziya mujima mmwibakila pa dimanya. Kí mmwibakila pa diitabuujja to.

⁹² Musangu kampanda ngâkabwela bwa kwenza disangisha mu ekeleeziya wa muntu kampanda. Dìvwa ndibalaasa dinene mu weste mwamwa. Muntu wa maalu malenga, kadi ùvwa uvila bintu bitùdì twètù twamba ebi. Kadi pààbi's, yèyè mwine awu uvwa. . . Mvwa mêmè mumuswe; muntu wa maalu malenga, muntu mukulumpe. Pààkapàtukà disangisha dyende. . . Mùvwa myaba ya bantu bàsòmba mitwe ku binunu bisambombo. Pààkapàtukà disangisha dyende adi, mu disangisha dya mu mapingaja, bantu batwe ku cinunu ne nkama yitaanu, bàvwa bònsò bantu baa mamanya a mu mitu bavwale bilenga bya kacya. Mêmè kusòmba mwab'awu mwikàle mbàbandila.

⁹³ Kuyiishaye diyiiisha dilenga dya dikema, yèyè muntu awu. Ki pashiishe kukonkaye ní kùvwa muntu uvwa muswe kwitaba Kilisto; bwa kwelabo anu kwanza byabo muulu cyanaana. Kadi muntu nansha umwe kaakeela cyanza muulu to. Kadi ndekeelu wa byònsò muntu mukaji kampanda kwelaye byanza muulu. Yèyè kwamba ne: “Eyo, mpindyewu wèwè udi mwena Kilisto,” ki kwenzaye bwa yèyè awu kubatijiiibwaye. Nenku pashiishe paakatukaye. . . Kulambulaye mwànà wa mu diboko, kutwaye mwànà mukese wa mu diboko awu mishiku ne kumwenzelaye disambila, ne kutangalajaye bateleji.

⁹⁴ Pààkapàtukà disangisha dyende adi, bònsò bantu balenga, bamanyi baa mabàlà, balonge tulaasa. Dìbà adi mêmè mvwa mwimanyine ku luseke, bwa kulabulaku muntu awu ku cyanza ne kumujingila dyakalenga dya kùdì Nzambi, mu dipatuka dyende amu.

⁹⁵ Nenku pângààkenzà nanku, ki wànyì musùmbà wùdi wùbwelà ewu. Kabavwa mwa kubiitabila bwa kubwelabo pàvwà wèndè musùmbà mucikàlemù apu to. Ki baanyi bàlwalwà aba, mu makalu a bikalaba, tulaalu twa dyambwila babeedi, jàketè ya bantu bàdi ne mukupa, bapàle, ne bikwabo byònsò. Nudi numona dishiilangana adi anyi? Ki bwalu abu's. Ki cyòci cintu cìndi munkaci mwa kwamba aci, nwamonu's. Nwamonu's, ncintu cishiilangane.

⁹⁶ Pààbì, ku dimanya dya maalù a mamanya wèwè's udi mwa kutwala Evanjeeliyo wa *umvwika*, mu mushindu wa ne, wèwè wamba ne, “ewu udi witabuuja Yesu Kilisto kaakupiishiibwaku to,” nwamonu's.

⁹⁷ Kadi: “Bimanyinu ebi nebifile bàdi bìitabuujà,” nwamonu's, yèyè ùbènga kwela Aci mwòmò amu, nwamonu's. Mukaji awu wakiitabuuja Yesu Kilisto, yèyè mmusungidiibwe, bimanyinu ebi pìikalàbi bifila mwena kwitabuuja.

⁹⁸ “Nenku ewu udi uteeleja Dìyì Dyanyi,” kaciyi anu kusoolakaja myaku cyanaana to, kî ngùDiteèeleja ne maci ende to, kadi, “ùDyùmvwa.” Muntu kanà yònsò ewu udi mwa kuDiteeleja; mukaji wa ndumba udi mwa kuDiteeleja kadi kushaala anu ndumba; nwamonu's, mukwaciki wa maala udi mwa kuDiteeleja; mwena mashimi udi mwa kuDiteeleja kadi kushaala anu mwena mashimi. Kadi: “Ewu udi umvwa Dìyì Dyanyi, ne witabuuja Ewu udi muNtume, ùdi ne Mwoyi wa kashidi.” Ki bwalu mbwòbù abu, nwamonu's.

⁹⁹ Ne muntu nansha umwe kèna mwa kwenzaku aci pàdì Nzambi kayi mudyanjile kumulongolola to. Yesu wakamba ne: “Muntu nansha umwe kèna mwa kulwa Kùndì, pàdì Taatù Wanyi kayi mumukoke to, ne bònsò bàdi Taatù muMpeeshe nebalwe Kùndì.” Amen. Byònsò mbilaale ku budishikaminyi ne didyanjila-kumanya dya Nzambi. Yèyè mmusòmbe nkaayende ne kakwena muntu nansha umwe udi uMwambila cya dyenza to.

¹⁰⁰ Mpindyewu, ku bupidya, ku dibenga kwangata kwa Dìyì dya Nzambi dyònsò, mbitwale dimiinu dya bupidya, dipanga cijila, dibiipa, lukinu, ne lufu lwa Cyendelele ludi mu cikondo cya ekeleeziya cibiipe, cya mamanya a mu mutu eci. Mpindyewu nwacyùmvù anyi? Mu dituku edi, mùdì baa pa buloba bujima anu batendeleedi emu! Nuvwaku bamanye aci anyi? Baa pa buloba bujima badi anu batendeleedi. Nenku mu cikondo cya batendeleedi eci, ekeleeziya minene mu disangu ne disangu dyònsò; byònsò, cintu cyònsò nkòong cìdi cikoobeka anu ku Sataana mwikàle ukuukudiibwa. S'ki cyòci eci, anu mu Bible emu mene. S'ncya bushuwa. Nenku mu maaseminere a mamanya a mu mitu, a teoloji àdì mapatule muntu wa mamanya a mu mutu udibo balongeshe mwa kwakula, cya dyenza, mushindu wa kwenzaye masaluka abo awu, ne bikwabo byònsò bu mùdì maalù

a mùdì kusòmba, bidimu bisatu anyi binaayi, bwa kumanya mwa kutangila mùdì meeji a muntu. Nwamonu's, cidi . . .

¹⁰¹ Nyuma wa Nzambi kî ncintu cya ne, wêwè, bàkubwejacì munda ku dikulongesha dya tulaasa to. Ncintu cidyanjila-kulongolola bwa kubwelaci munda mwebe, kùdì cyanza cya Nzambi wa Bukole bwònsò. Malabula ebe kaena mwa kwikala makubweja munda mwebe ku tulaasa tulonga anyi ku dikulongesha kampana to. Mmadyanjila kulongolola, kùdì cyanza cya Nzambi ne ku didyanjila-kumanya dya Nzambi, bwa kubwelawu munda mwebe. Aci cya bushuwa.

¹⁰² Mpindyewu, ncilwe kulela Edena munene udibo basòmbèlemù mpindyewu ewu, Edena wa bukwaèkèleeziyà ewu. Yònsò yìdì munkaci mwa kudisanga patùdì twakulangana apa ku Nsangilu munene wa Bukwàntèndeleele, ne neyìikalè mwa kufikisha bukwaèkèleeziyà bwònsò mwinshi mwa mutu umwepele, mwikalà Sataana mwa kushikikiibwa pa nkwaswa wa butumbi, anu menemene.

¹⁰³ Nenu dibiikila dya ndekeelu didi munkaci mwa kwenzeka, bwa kubakula Mukaji-musela kumpala kwa Yèyè kubwela mu cyòci aci. Bwalu pàdiye anu ne wàbwedi mwómò amu, wàmanyi kupeta cimanyinu cya nyama wa lwonji, ne kwediibwa mulawu, yèyè kaadyaakupatukamu to. Ki bwa cinyi, badi bamba ne: "Patukaayi munkaci mwabo, nwènù bantu Baanyi," kumpala kwa kubwelaci mu yèyè awu, nwamonu's. "Patukaayi munkaci mwabo, ne ikàlaayi batapuluke."

¹⁰⁴ Mpindyewu, lukinu ne lufu, ne ditapuluka dya Cyendelele ne Nzambi, mu ewu Edena; dyalakana, bukooya, dinyangakaja, (bishi nanku?) ku dimyamina dya dimiinu dibi.

¹⁰⁵ Cidi cimvulwija cikeena-kumona cingàakamònà kumpala kwa mèmè kutuutakeena ne beena Mpenta, cya Muntu uvwa wenda unyunguluka buloba bujima awu, muvwale bilàmbà bitooke awu. Nukaadi bangumvumvwe ncilonda misangu yàbùngì. Kadi mukwabo kulwaye paanyima Pende, wènda ùmyamina mamiinu a dibenga kupetangana.

¹⁰⁶ Kadi yèyè wakacicimuna bilenga bya dikema, mu Eva . . . mu budimi bwa Edena, ku dyalakana dya Eva bwa mpekaatu; dyalakana bwa Eva, dya mpekaatu. Dìbà adi, piikalàbi ne Eva wakaalakana dimanya, s'civwa mpekaatu.

¹⁰⁷ Ne patùdì twalakana dimanya, tukeba mapolome a Ph.D., LL.D., cidi mmpekaatu pa kwenza nanku. Awu mmèyi makole boo, kadi m'Bulelele. Nansha ciikàle cikole boo bishi, cicidi anu Bulelele, nwamonu's. Kwalakana dimanya, dyumvwa!

¹⁰⁸ Bwalu bùdì mwab'awu, bùdì ne, leelu katwena tuteeta kushindamija Dìyi dya Nzambi munda mwa myoyi ya bantu to. Tudi tuteeta kudishindamijamu twètù biine. Ekeleeziya yidi

yiteeta bwa kushindamija dilongesha dya ekeleeziya, mu mwoyi wa muntu.

¹⁰⁹ Mbatutumine dîyî bwa kushindamija Dîyî dya Nzambi. Pòlò mmwambe ne: “Ncyakalwa kunùdi ne mēyî a bantu a akoka ntema to, bwa diitabuuja dyenu kushaaladi disòmbèle pa dimanya dya bantu to; kadi ngâkalwa kunùdi mu bukole, mu dimweneshiibwa dya Nyuma Mwîmpè, bwa diitabuuja dyenu kushaaladi disòmbè mu Nzambi.” Ki bwalu mbwòbù abu.

¹¹⁰ Muntu kadishindamijiku yêyè mwine to. Tudi tucisangana munkaci mwa . . . Nzambi adidinge anu ênzè cintu kampanda bwa muntu kampanda ne amutume anyi, nudi nusangana ne muntu yònsò ukaadi uteeta kucitentula. Nwamonu’s, badi bateeta bwa kudishindamija bôbò biine. Muntu yònsò ne: “Mêmè’s ndi mwenze *cikampanda*. Mêmè ewu, mêmè, mêmè, dyanyi mêmè, dyanyi dingumba, mêmè, *cikampanda*,” badishindamija bôbò biine’s. Citùdi tuyiisha ncinyi, ntwètù biine anyi m’Bukalenge bwa Nzambi?

¹¹¹ Shindamijaayi Dîyî dya Nzambi. Patulaayi bupidya munda mwa muntu nushindamijemu Bukalenge bwa Nzambi. Ne Bukalenge bwa Nzambi kabwenaku mwa kushindamijiibwa mu mwoyi wa muntu pàdi Nzambi kayi mwenze mwine muntu awu mushindu awu to. Yêyè kêna mwa kushindamijiibwa mu . . .

¹¹² Nenku, vulukaayi, diseeswishangana didi mu ne, bantu bàdi beela meeji ne mbulelela. Nwamonu’s. “Kùdi njila udi umweka kùdi muntu bu ne mmulelela.” Muntu yònsò wetu wa mamanya a mu mutu ewu’s ùtu umweka bu ne ùdi mu bulelela.

¹¹³ Anu mûmvwà munulondele kukaadi maadyalumingu ndambu amu’s; pâmvwà mwimane ku luseke lwa mwanaanyi wa mu diboko uvwa upunga ne lufu awu, ne Sataana mwimane mwab’awu wàmba ne: “Papa webe’s nyêyè awu, mukufwile mu maboko ebe diloolo adi. Mukajeebe’s nyêyè awu mulaadika mu—mu nzubu wa bitalu mwamwa, kadi ki mwaneebe wa mu diboko nyêyè awu ùya. Nenku wêwè wâMulòmbu bwa akumvwileku, kadi Yêyè’s nyawu wakwinjididi . . . Yêyè wapwekeshi cilàmbà cikudika kumpala kwebe. Mpindyewu, kadi Pende’s n’Nzambi mwîmpè, peebe’s uvwa wamba mùdiYe Mwondopi. Ne wêwè, mwine udi utwa cyûvwà wamba ne ncilelela nyama ku mikolo awu, wêwè’s udi mupiile.” Kaa, dilukakaja dyònsò dya lungenyi, cyeledi cyònsò cya meeji’s civwa ne cya kwitaba ne aci civwa cya bushuwa; ne yêyè mwine’s uvwa mubinge, bwa byòbi abi.

¹¹⁴ Mushindu wumwewumwe awu ngùvwàye kabidi anu mubinge paakambilaye Eva ne: “Mèsù enu neatabale, ne nenujingulule maalù mîmpè ne maalù mabi. Ne nenwikalè bu banzambi, mushindu awu, bajingulule maalù mîmpè ne maalù mabi” apu, bwalu Nzambi kàvwa mwanji kubalekela bàdimanyina bôbò biine ne, bàvwa butaka to. Pa nanku baakamanya ne bàvwa mwa kujingulula maalù mîmpè ne maalù

mabi; nenku yêyè uvwa mubinge. Kadi, nudi numona's, cìvwa cibengangane ne Dìyì dya Nzambi.

115 S'ki mùdì kabidi bambi benza mu maaseminere, bàlonga teoloji mukwatakaja kùdì bantu; ùdì mwa kumweka bu ne ngwa cya bushuwa, ùdì mwa kumweka bu ne ki dyumvwa dîmpè dya cintu, kadi ngwa mafi.

116 Kabyena bikengela bwa twètù kuCyumvwa to. Tudi twètù tuCiitabuuja bwalu Nzambi mmwambe ne ki mùdìci nanku, nenku aci cìdì cikosa bwalu kashidi. Cintu mu kaabujima kààci, awu ki mushindu wa kuCiitabuuja.

117 Kaa, mushindu mwine wàkaalakanà Eva bwa kupetaye dipolome dya Ph.D., nwamonu's, mushindu mwine wàkaalakanàye bwa kwikala ne meeji matwe kutamba mùvwàye amu's we!

118 Monaayi mushindu wùdìbi bitambe kufwanangana, mulume ne mukajende. . . Mpindyewu monaayi, mulume ne mukajende, bônso babidi butaka mu budimi bwa Edena, Edena wa Nzambi.

119 Mpindyewu nêngìikalè mwa kujikija. Mvwa mwambe ne nêngìikalè mwa kunulama anu tusunsa tukese cyanaana. Tangilaayi, tangilaayi bîmpè mpindyewu, pânkaadì njikija apa.

120 Fwanyikijaayi eci mpindyewu, mùdìbi bifwanangane bikole bya mulume ne mukajende, bônso babidi mu Edena wa Nzambi, kabayiku ne kaamukusu kaa cilàmbà pambidi to, kadi kabayi bacimanye to. Kabavwa bacimanye bwa cinyi? Bwalu bàvwa babwikila kwìsù pa bìdì bitàngilà byumvwilu byabo bya butaka abi, ne Cibwikilu cya Cijila, cya Nyuma Mwîmpè. Bàvwa mwa kutangilangana buludi ewu ne ewu, kadi kabayi bamanya ne bàvwa butaka to. Bàvwa babwikila kwìsù ne Nyuma Mwîmpè, wa cijila. Bàvwa babwikila kwìsù.

121 Cibwikilu cya Nzambi, too ne leelu ewu, badi mwa kutangila kadi kabayi baalakana to. Badi batuma mutu ku luseke. N'Cibwikilu cya Cijila, nwamonu's, Cibwikilu cya Cijila. Nzambi uvwa mwenze ne mèsù abo. . . bubidi bwabo, umwe uvwa mulume ne mukwabo uvwa mukaji, kadi kabayi bamanye ne bàvwa butaka to, bwalu cijila cya Nzambi cìvwa cilame mèsù abo majika ne cibwikilu. Monaayi, Nzambi uvwa musokoke kondo kaabo kaa mwoyi mpekaatu, ku Cibwikilu cya Cijila aci.

122 Mvwaku mwa kujinga bwa twìkalakù ne ndambu wa dîbà bwa kwalabala pa bwa abu, ndambu wa tusunsa. Tangilaayi kuneeku: "Bwalu yêyè, mukuukwidi pàdìye anu ukezudiibwa musangu umwe," Ebelu, "mukuukwidi pàdìye anu ukezudiibwa musangu umwe, kàcyenà kabidi ne civulukilu cya mpekaatu nansha." Mpekaatu ukaadi mumane kupita ne mumuumuke.

123 Mvwa muumvwe Mwaneetu Neville wamba, mu dinda emu, muntu kampana uvwa mufwanyine kwikala umukonka bwa cinyi ncyèna muiyishe pa Nyuma Mwîmpè, bwa cinyi ncyèna

mwenze *cikampanda*. S'ki cyôci eci. Nyuma Mwîmpè ncyenzedi munda mwebe. M'Mwoyi kampanda, kî ndisaluka to; kî ncileeeji cya mushindu kampanda cya musunya nansha. Kadi Yêyè m'Mupersona, Yesu Kilisto, Dîyî dya Nzambi dishindamija munda mwa mwoyi webe, bwa kuvwija ne mwoyi Dîyî dyônsò dya cikondo eci. Cya bushuwa. Tangilaayi numone Nyuma Mwîmpè mu cyenzedi; kacîyi menemene mu dileeja dya patooke to; kadi, mu cyenzedi, cîdîYe wenza bilondeshile Dîyî.

¹²⁴ Monaayi mpindyewu ne Nyuma Mwîmpè, wa Dîyî dya Cijila dya Nzambi awu, ùvwa ne mulume ne mukaji butaka, kadi kabayi bacimanye to. Bilenga bilayà, Mwoyi wa Dîyî; Dimiinu, Dîyî!

¹²⁵ Nzambi wakamba ne: “Kùdi mucî kampanda munkaci mwa budimi amu, mukaji. Nenu munkaci mwa budimi mmùdî mucî ewu; nansha kuwulenga kwine kuwulengiku to. Bwalu, dituku dyûdi ukûdya, dituku adi ndyûdi ufwa.” Bàvwa babwikila ne cijila ku cyôci aci, kabayi bamanye kantu nansha kamwe pa bwalu abu to, kabayiku mwa kudidinga kukùlenga to.

¹²⁶ Bàvwa babwikila ne cijila. Bàvwa bakubiibwe mu nzubu mulenga kumona wa ciikishilu wa Nzambi. Bàvwa ne mwoyi. Kabavwaku ne lufu pabwîpî naabo to. Aleluuyah! Bàvwa ne dinanga dipwangane muntu bwa mukwende, Mwoyi bwa kashidi mupwangane. Bàvwa ne dinanga dipwangane, dyumvwa dipwangane dya dinanga dya Nzambi. Bàvwa ne Dîyî dya Nzambi, ne bàvwa baDilame. Ne bàvwa ne mwoyi ne bakubiibwe mu Edena wa Nzambi, kabayi ne lufu, nansha lwa kânà, pabwîpî naabo apu to.

¹²⁷ Pashiishe, Sataana kufikishaye Eva ku diteeleja evanjeeliyo wende wa teoloji awu, evanjeeliyo wa dimanya, dilonga dya tulaasa ditambe kubândila, nsômbelu wa bukalanga mutambe kubândila, dishidimuka ditambe bwîmpè, kalaasa kalonga kaa katambe kubândila, ne bikwabo; dîbà adi paakafikishaye anu . . . paakamufikishaye ku dyanji kwimana ne kumuteelejaku ndambu, ku diteeleja dilukakaja dyende dya lungenyi adi (diine didîbo batutumine dîyi bwa kutônkola adi's), paakamufikishaye ku diciteeleja.

¹²⁸ “Mpindyewu, tangilaayi kuneeku, ekeleeziya *ncikampanda-cikansanga*. Yêyè ukaadi mumana kushindamija anu kwine kwônsò aku. Twêtù tudi umwe wa ku ekeleeziya ya mitambe kwikala ya kale mu ditunga. Mulombodi wa cimenga ùtu uyamu.” Bwanyi mêmè nansha ciikàle cinyi, nwamonu's. Cyôci cibangana ne Dîyî dya Nzambi, wêwè bengangana naaci. Awu mmwena lukuna webe. Cyônsò cîdî cibangana ne Dîyî dya Nzambi mmwena lukuna webe.

¹²⁹ Cyônsò cîdî cipetangana ne Dîyî dya Nzambi mmwaneenu. Yêyè awu ncutupa cya ku wêwè.

130 Monaayi, mukaji awu kutuulaye Cibwikilu cya Cijila aci, bwa kumona ne mubidi wa bulume ne bukaji wùvwa ncinyi menemene; anji fwanyikijaayaaku aci, cìvwà menemene mwa kwikala dyalakana difwanyine kwenza. Yèyè wakatuula Cibwikilu aci e kucyumushaye ku mèsù kwende, cintu cya cijila ciine cìvwà Nzambi mumuteeke ku mèsù aci. Yèyè wakajinga dimanya, bwa kumanya ne cyònsò aci cìvwa ncinyi; pa nanku yèyè wakatuula Cibwikilu aci bwa kumanyaye ne cyònsò aci cìvwa ncinyi. Yèyè wakateeleja dyabulu, kadi monaayaaku ne mmu mwaba kaayi wakamuteekaci.

131 Mbenze anu cintu cimwecimwe aci mu cikondo ne cikondo cyònsò cyàkalondà, biikàle bangata misangu yònsò anu luseke lwa mamanya a mu mitu; ne patùdi twakulangana apa bàkaadi biibake bukalenge bwa Sataana, dimanya, dimiinu dyende yèyè dyakamyaminaye adi, ne mbalwe kuvwija buloba bushaale Edena wa lufu.

132 Monaayaaku mpindyewu. Mpindyewu tangilaayaaku mu Bwakabuulwibwa 3, Cikondo cya Ekeleeziya wa Laodikiya. Elenganaayi meeji pa cyòci aci mu mitu yenu amu.

133 Monaayaaku mpindyewu. Yèyè, Eva, mmukalenge-mukaji wa Sataana. Nwamonu's, Sataana, nyoka awu, wakashaala ne Eva kumpala mene kwa Adama kushaalaye nende. Nwamonu anyi? Aci ncya bushuwa. Pa nanku yèyè wakamwambisha, nwamonu's; pa nanku Sataana, nyoka awu, nguvwa bayende wa Eva kumpala mene kwa Adama kumanyaye. Nwamonu's, yèyè wakamwambisha. Bible mmwambe ne ki cyakenzaye, neku kumanyaye ne ùvwa butaka, dîbà adi. Nwamonu anyi?

134 Mpindyewu tangilaayi Cikondo cya—cya Ekeleeziya wa Laodikiya. Yèyè, Eva, mmusòmbe bu mukalenge-mukaji wa Sataana. “Yèyè mmubanji mu bintu bya pa buloba; mpofo, mwikàle cyakabidi butaka, kadi kayi mucimanye to,” anu mùvwàbi mu Edena wa Nzambi amu. Kadi mpindyewu, kabiyi ne mbwalu Cibwikilu cya Cijila cìdi pa mèsù pende to, kadi ncibwikilu cya dyalakana. Aci, yèyè mmutuule Cibwikilu cya Cijila cya Nzambi, kadi kuvwala cibwikilu cya dimanya, bwa dyalakana. Ne patùdi twakulangana apa yèyè udi ne cibwikilu cya dyalakana, cìdi cyènza ne yèyè ikalè “mpofo” bwa kayi umanya ne mmpekaatu to. Yèyè udi “butaka” mu mùsèsèsù, “kadi kayi mucimanye to.” Yèyè udi ndumba mu mùsèsèsù. Bakaji bavwale tuputulu etu, ku mèsù kwa Nzambi, s'ndumba, “kadi kayi mucimanye to.”

135 Monaayi, angataayi bakaji beetu twètù aba. Mpindyewu, nwènù baswe kumona ne mmu ngiikadilu kaayi mùdi ekeleeziya usanganyiibwa, tangilaayi numone mushindu wùdi bakaji benza maalù. Mukaji misangu yònsò ùtu anu cimfwanyi cya ekeleeziya. Mu Edena wa Sataana, wa mpekaatu ne bupidya, dinyangakaja dya mu ntendeleelu; bukalenge bunyangakaja. Pamutu paa

kwangata Dìyì dya Nzambi, bôbò mbangate dilonga dya mamanya a mu mitu dya bantu. Ne pamutu paa kwangata Ekeleeziya, bôbò mbangate bulongolodi, ne badi munkaci mwa kuya naabu tamakatamaka too ne ku mutu munene wumwepele.

¹³⁶ Mpindyewu monaayi, cinyangakajila kuumukila ku butooke bwa munda. Bwa mpindyewu eci kacinupiciku to. Ekeleeziya udi ne cibwikilu cya dyalakana eci pa yêyè. Monaayi cìdici cimwenzele. Cyôci aci—cyôci aci ncimnyangakaje cimuumushe ku butooke bwa munda ciye nende ku dimanya. Nwamonu anyi? Cibwikilu cya Cijila aci, yêyè uvwa mutooke munda; pàdiye ne cibwikilu cya dyalakana aci, yêyè udi ne dimanya. Mmumanye ne didi dyanza disanka. Yêyè mmumanye cìdidi dyanza, nwamonu's. Ncimunya, mucu wa kwikala kujinga, mwikàle wuvwijangana ne lungenyi. Nwamonu anyi? Yêyè mmunyangakajiibwe kuumuka nende ku butooke bwa munda kuya nende ku dimanya, kuumuka ku cijila kuya ku bukooya ne dyalakana, ne kuumuka ku Mwoyi kuya ku lufu.

¹³⁷ Bikengela ne bukalenge ebu bufwe. Bukalenge ebu nebufwe! Nzambi wa mu Dyulu neabubutule ne kubuumusha panshi paa buloba.

¹³⁸ Monaayi, mu dinyangakaja edi, bikaadi byumuke kùdi mulume biye kùdi mukaji, ne byumuke kùdi mukaji biye kùdi mulume, kadi “kabayi bacimanye to.” Cintu cipeta cîmpè cya dikema cya Edena wa Sataana, bu nwênù mwa kutangila mìsèsù leelu wa Ndaaya ewu, bantu beetu baa cyena leelu aba.

¹³⁹ Monaayi, Eva ku bukole bwa dyalakana dyende nguvwa Sataana mukwate nende mudimu bwa kufikisha Adama ku dyanza mpekaatu. Mpindyewu cintu cimwecimwe aci, munkaci mwa kwenza cintu cimwecimwe aci leelu ewu. Monaayi, nsuki mibebula, kwîsù kulaaba bilaabu, muvwale bilâmbà bya disalulangana naabi masandi, nwamonu's, yêyè udi wenza cyôci aci, kadi kayi mumanye ne cyônso cya ku bintu abi cidi cibengangana ne Dìyì dya Nzambi to. Kukosa kwa nsuki yende, kùdi kumuvwija mukaji wa ufwishangana bundu, ndumba. Kuvwala kwa tuputulu, s'kùdi kùmushiya byenze ne bundu. Kuvwala kwa bilâmbà bya bisalulangana masandi, s'kùdi kumuvwija ndumba. “Kadi yêyè kî mmucimanye to,” kaciyi bwa cijila cya Nzambi to; bwa dyalakana dya Sataana. Mmumuvwije. . . Yêyè mmufikishe Adama wende ku dimwalakana.

¹⁴⁰ Yêyè mmuvuule bilâmbà bìvwà Nzambi mumuvwadike, mu Edena mwamwa, bwa lwendu lùvwàye ne cya kwenza bwa kukosolola cipeela eci—eci. Yêyè mmubivuule. Mmudishiye pulupulu. Pààbi, Nzambi's uvwa mumujìngìle biseba pambidi pajima; yêyè mmubange wenda ubiipidija misangu yônso ku kakese ku kakese, patùdi twakulangana apa ùkaadi mwalukile kùvwàye ku cibangidilu aku.

141 Patùdì twakulangana apa's yêyè ùkaadi mufikishe Adama wende ku divwala dya tulàmbà twende yêyè twa mwinshi. Muntu mulume wadidìnga kuvwala tuputulu tukese twa kale twa mmwenekelu wa buucilùmaacikàjì atu awu, kadi kupatuka pambelu apa, mêmè ncyèna ngeelaku meeji ne mu yêyè amu mùdi menemene bulume to. Yêyè kadi ki cilùmaacikàjì cyebe cya citambe bunene cìndiku mumanye. Nwamonu anyi? Nwamonu's, yêyè wafikishi Adama wende munyangakaja awu ku dyaenza maalu bu yêyè, nwamonu's, ùvwàla bilàmbà bya mwinshi bya mukaji. Wámònu cìvwàye mufwanyine kwenza kwaka aci pàakavùùlàyè bilàmbà byende byònsò pa kuumusha anu bya mwinshi apu. Abi ki tuputulu's. Mu bushuwa bwa bwalu, twòtù atu's ki bilàmbà bya mwinshi bya mukaji, nenku's ki Adama wende nyêyè ewu ùbìvwàla mpindyewu. Bya bwalu, bilondeshile Dìyì dya Nzambi dya ku cibangidilu: "Ncinyangu bwa muntu mukaji kuvwala civwalu cidì cikumbanyine muntu mulume, ne bwa muntu mulume kuvwala civwalu cidì cikumbanyine muntu mukaji," kacya anu ku Dìyì dya ku cibangidilu. Anji elaayibi peenu meeji ku bwalu abu!

142 Mpindyewu, mulume ukaadi pende mpindyewu ne myalala ya nsuki, yitù naayi mukaji ayi. Ùdi uyeela cisaku uyipwekesha, wènzamù mvwangala. Bimwe bya ku bintu bya bitamba kwendeshangana ku mwoyi bìnkaadiku mêmè nciyiku mumone kacya bandela's, s'mbamwe baa ku bânà abu pambelu apa leelu ewu biikàle ne miine myalala yabo ya nsuki ayi myela cisaku mipwekesha mushindu ewu, kadi beelemu meekala, nsuki mitookoloke yònsò ne muunya, miikàle ne bwanga bwengulula bwa mushindu kampanda bwa buvwija nsuki mipeepele, ne bwikàle butookoloja nsuki yabo ayi, kadi bavungilamu bikùdì, kadi yenza myalala. Cilùmaacikàjì naanyi we! Aci's ncintu cibi be cya kwamba mu cyambilu, kadi cilumbulwidi cidì cibangila mu nzubu wa Nzambi. Kwèna wèwè mumanye nansha ne udi mulume anyi udi mukaji to. Ne ndi ngumvwa bamba ne kumpala kutuyaaya eku basalaayi baa Cilwilu cyetu cya États-Ûnis nebapatuke bawwale tuputulu. Ncya bushuwa. Nudiku numona cidì dinyangakaja anyi? Mbilàmbà bya muntu mukaji; mwikàle ne myalala ya nsuki ya muntu mukaji.

143 Dituku kampanda, mvwa nsanganyibwa mu Howard Johnson's; kî ngudi apa ewu to, kadi udi wa mu njila wa mu dipatuka wawa. Ki mêmè kushaala musòmbe anu mwaba awu mu dikacila's. Ki mwânà mukese wa balume ulwàlwa ewu, mukana mulekelela. Nenku ùvwa ne nsuki mifiike apa, ne muyèlè cisaku muyitume mushindu ewu; ne mwelemu cikùdì, ne muyènzè mvwangala mu nyungulukilu amu, kumutu kwa mèsù aku; mwikàle utangidila lwà kuulu kwa mèsù aku, wendakana eku ne eku. Ní nkaadiku mumone dinyangakaja's! Nwamonu's, yêyè kàvwakù mufwanyine kuciitabuuja to. Yêyè's ùvwa pàmwàpa mufwanyine kujaadika ne yêyè uvwa muntu

mulume, kadi mu nyuma wende yêyè mmuntu mukaji. Kí mmumanye ne ngwa luseke kaayi lwa nzubu to. Ncya bushuwa's. Mushindu mwine wùvwàye munyangakajiiibwe's we!

¹⁴⁴ Ki cidi Sataana wenza ncyôci aci. Yêyè udi unyangakaja matunga. Ûdi unyangakaja ekeleeziya. Ûdi unyangakaja bantu. Yêyè mmuseeswishanganyi, munyangakaji wa Bulelela bwa ku cibangidilu.

¹⁴⁵ Nzambi wakenza muntu mulume mulume. KwenzaYe muntu mukaji mukaji. Ne Yêyè wakabavwadika bishiilangane, ne Yêyè uvwa ne meeji a kushaalabo mushindu awu ne kwenzabo maalu mushindu awu; umwe mmukaji, ne mukwabo mmulume. Yêyè wakaabulula Adama mu budimi bwa Edena, ne wakenza cyôci eci, kutapulula Eva kùdiye.

¹⁴⁶ Mpindyewu nyêyè awu ne myalala ya nsuki ya mukaji; mukaji ukosa nsuki yende byenze bu ya mulume, ne mulume uteeta kwikala ne yende byenze bu ya mukaji. Nwamonu anyi? Mukaji udi uvwala bilàmbà bya mulume bya pamutu, kadi mulume uvwala bilàmbà bya mwinshi bya mukaji. Mpindyewu, aci cidi cyumvwika cya cinyangakaja cijila, kadi ncyèna ncyamba mu awu meeji to. M'Bulelela bwa Evanjeeliyo anu bwa kabuyi dyela mpatà ebu. Wêwè kuyi mucimanye to, dîbà adi kùdi cintu kampanda cipampalamuke mu wêwè amu; anyi udi mpofo anyi kùtukù mwanji kwendela mu misèèsù to. Nenku mukaji udi wela meeji ne mulume udi wela meeji ne mbîmpè, bapetangana mu ngeelelu wa meeji mu mwaba kampanda.

Bakaji badi bamba ne: "Akàà, s'kùdi luuya lwa dikema!"

¹⁴⁷ Ba-Indiens bakulakaji baa ba-Apaches kuntu kwaka's mbafwanyine kunufikisha ku didyumvwa bundu. Pàdìbo batamba kuumvwa luuya lukole menemene apu, pààbò bavudija bilàmbà pambidi, bwa kudilama ku muunya; kaka, bya bikopakajijangana's, mu mushindu awu wêwè's udi mwa kwikala ne cyamu cifidi cya citaleela pàdìbo benda apu. Nwamonu anyi? Badi bôbò biimanyina anu pambelu pa muunya apu.

¹⁴⁸ Wêwè kwèna mufwanyineku kutwala cintu nansha cimwe to; mubidi's mmufwanyine kukutàla mabuba ne kwoshika. Kadi, nudi numona's, s'ki cinùdi nwènù nubiikila ne ndilonga dya kalaasa ditambe kubàndila. Maalu a mamanya a cyena-leelu's ngàdi mapatule cyôci eci. Kaa, ekelekele! Ki yêyè awu's, "butaka," mu Laodikiya, "kadi kayi mucimanye to."

¹⁴⁹ Yêyè uvwa butaka mu Edena. Nudi numona makalenge abidi awu mùdìwu mafwanangane anyi? Bumwe mbwà mpekaatu ne lufu, bukwabo bùdi Mwoyi ne bwakane. Mwômò amu mukaji uvwa mubwikila ne Cibwikilu cya Cijila. Bubidi bwabo bàvwa butaka; kabavwa bacimanye to. Kabavwa bamanye cintu nansha cimwe pa bwalu abu to, bwalu bàvwa babwikila kùdi Nyuma wa Nzambi.

¹⁵⁰ Kadi mbòbò abu babwikila kùdì dyalakana, ne biikàle bàtàngilangana ewu ne ewu bwa. . . Nwamonu's, Adama uvwa mwa kutangila Eva, kadi kayi umanya ne ùvwa butaka to. Kadi mpindyewu ne cibwikilu cya dyalakana eci, mukaji kèna umanya ne yèyè mwine udi butaka to, kadi udi ucyenzela ku cibwikilu cyende cya dyalakana eci bwa kufikisha balume ku dimutangila. Ki cintu cimwepele cidiyekù mwa kucyenzela's. Kwèna witabuujja aci to, kadi ki cyùdi wenza nansha bya munyi, ne balume badi batangila. Ne muntu mulume ukaadi mujandule ne wèwè udi ukoka ntema ya dikema, mu mushindu wa ne yèyè udi usemena kadi kuvwala bimwe bya ku bilàmbà byebe.

¹⁵¹ Kaa, dinyangakaja kaayi edi's we! Cikondo kaayi eci's we! Cikondo kaayi citùdì. . . Mushindu mwine wùdici ciseeswisha's! Kaa, bintu byònsò ebi, "kadi kayi mucimanye to," nyuma munyangakaja anu wa menemene udi munda mwa muntu mulume awu. Yèyè mmubwikila kùdì dyalakana dya Sataana, ne mukaji pende. Nnyuma wa Sataana wa kasumbu kanene kaa bantu kasunguluke. Nwamonu's, bòbò kî mbamanye to, kadi's badi bulongolodi. Bakaji bavwale tuputulu, biikàle baa mu bulongolodi kampanda. Balume bavwale mushindu awu, biine abu biikàle mu bulongolodi kampanda. Nènnùpèèshè dìnà dyàcì mu cikeepeshilu: K.K.B., Kasumbu Kaa Baayààyà, pa nanku bòbò mbaa mu cyòcì aci. Patukaayi muntwamu, mu kasumbu kaa baatùtù bilùmààbikàjì amu, mùdìbo bavwale tupanupanu atu amu, tuntu twa mmwenekelu wa mukodyakanangane, mmwenekelu wa manyaanu atu. Mèmè ndi—ndi. . .

¹⁵² Nwènu balume, mpindyewu nudi mwa kupangakana naanyi pa bwalu ebu, kadi aci's m'Bulelela. Nukaadi banyangakajiiabwe kadi kanuyi bacimanye to. Kwèna, kùcyenà kabidi wenza maalu bu muntu mulume to. Nwamonu's, wènda ùshaala mutulumuke wa menemene; nenku, mwanende wa balume, kaakwikalaku cintu cya bushuwa eci kùdiye to; balume, ne bakaji paabo. Badi kasumbu kaa bantu kasunguluke. Ki bulongolodi mbwòbù abu. Bwa cinyi? "John, mwena mutumba neetu, s'ùvwa muvwale tuputulu, kadi mèmè nciyi mwa kutuvwala bwa cinyi? Luella uvwa muswe bwa mèmè kutuvwala bwalu John nyawu ùvwa mutuvwale, mwena mutumba neetu awu. Nenku, ee, piikalà—piikalà Suzie Jane mwa kutuvwala, Martha Jane's udi anu mwa kutuvwala pende, anyi Susie Lou," anyi dìnà dya mukaji awu diikàle nganyi, nwamonu's. Nwamonu's, cintu's nkasumbu kaa bantu kasunguluke. Cintu's mbulongolodi. Mu nyuma mmunùdi baa mu kòkò aku, kadi kanuyi bacimanye to.

¹⁵³ Ne piikalàbi nanku, ne twètù tudi tumona ne bidi nanku awu, nanku nudi bafomija. Nudi bafomija bwa kanuyi mwa kumona mangumba aa mùdì Sataana munukonyangaje munwèlèmu amu. Ne cidi ndinyangakaja dya Dìyì dya Nzambi dya ku cibangidilu, ne dya Bukalenge Bwende, ne dya ndongamu Wende bwa bânà Bende. Sataana ukaadi mukonyangaje balume

ne bakaji mubabweje mu bintu ebi, kadi kabayi bacimanye to. Banyangakajiibwe!

¹⁵⁴ Kàcyèna kabidi mwânà wa balume wa Nzambi to! Myalala ya nsuki mimupwekele mu mpala, ne kaputulu kavwala, wènda wèndakana mu mùsèèsù; mwânà wa balume wa Nzambi, mulami mu ekeleeziya kampanda, mpaasata mu cyambilu? Bwâlà, awu kî mmwânà wa balume wa Nzambi to. Kacya yèyè kàtu mupicileku mu Kasengulu kaa dyela meeji kaa Nzambi to. Yèyè kavwaku mufwanyine kwikala muvwale bilàmbà bya bantu bakaji abi to; kavwaku mufwanyine kwikala mubivwale to; ne mukaji mwine pende kavwaku mufwanyine kuvwala bilàmbà bya bantu balume to. Nwamonu's, kî mmwânà wa balume wa Nzambi to. Mmwânà wa balume wa Sataana, ne mwânà wa bakaji wa Sataana. Cintu cicolàkòlààyì cya dyamba's!

¹⁵⁵ Sataana mmutuute dyakalenga mu dinyangakaja ne dyangata dya bukookeshi pa buloba, ne kubuvwija bukalenge bwende; bwalu muntu wakateekiibwapu, ku budishikaminyi bwa disungula, bwa kudisungwilabo mushindu wa nsòmbelu wùvwàbo bôbò bàjinga. Nenku aci ncidì cileejà ne cidì mu mwoyi webe ncinganyi. Nwamonu anyi? Dîyì dyebe dya mukana adi. . . Nudi bamanye mùdi bwalu anyi? Byenzedi byebe bìdi byakula ne dîyì dikole be, mu mushindu wa ne bìdi bijibakaja dîyì dyebe adi. Uh-huh!

¹⁵⁶ Nye mèmè anu kùdi muntu mulume kampanda. Yèyè wamba ne: "Kaa, mèmè. . . Twètù bônso's tudi beena Kilisto. S'tutu baa mu ekeleeziya." Kadi fòtò ya baji baa maja baa bàvùula ne bilàmbà mikudika ku bimanu kwônso kwa birô byende anyi? Huh! Cìdiye mungambile aci kî ncifwanyineku kushintula cintu nansha cimwe to, mèmè's ndi mufwanyine kumanya cidì cilelela; nansha wèwè awu.

¹⁵⁷ Muntu mukaji yèyè wàmba mùdiye mwena Kilisto, cibì mwikàle ne nsuki mîpi anyi? Abu kuleka! Wèwè's udi mumanye cidì cilelela, wamonu's. Eyowa's, mukalenge. Yèyè wàmba mùdiye mwena Kilisto, mwikàle ne kapenta ku mishiku ne bilaabu kwìsù, muvwale kaputulu, kadi wàmba mùdiye mwena Kilisto anyi? Wèwè's udi mumanye cidì cilelela. Dîyì dya Nzambi's didi dikulongesha cidì cìmpè kutamba aci. Dîyì's didi dyamba ne yèyè kèna mwa kwenza aci kadi kwikala mwena Kilisto to. Yèyè udi mene wa ufwishangana bundu, ne bikwabo byônso. Mmunyi mwikalà Nzambi mwa kuteeka cintu cya cifwishangana bundu mu Bukalenge Bwende's? To, mukalenge, nansha kakese. To, mukalenge. Bôbò biine, s'badi baleeja dijinga didìbo naadi.

¹⁵⁸ Kwèna mwa kufikishaku nyuunyi wa nkuci ku didiila kaaba kamwe ne kabangu-nyuunyi to, nansha kakese. Nyuunyi wa nkuci kàtu ne kanyonga to. Yèyè kèna mwa kudyaku bintu bya bibole abi to. Yèyè mudidinge mubimineku anu

cyanaana, s'mbifwanyine kumushebeya, ne yêyè mmucimanye. Kadi kabangu-nyuunyi yêyè udi mwa kudya pamwe ne cintu kanà cyònsò cìdiye muswe kudya aci. Nwamonu anyi? Yêyè udi ne mâyi a kanyonga bûngi cyanaana.

¹⁵⁹ Pa nanku dîbà adi udi usangana ne, mushindu awu ngùdibi ne baa pa buloba leelu ewu, cintu cimwecimwe aci ne: “Badi butaka, bampofu, kadi kabayi bacimanye to.”

¹⁶⁰ Sataana wakacyenza ku dyalakana divwà naadi mukaji bwa dimanya, bwa disangila dya mulume ne mukaji, dyakasungulaye ku disungula dyende yêyè mwine. Mpindyewu monaayi, Eva ngwâkabweja Adama mu cilema, ne mukaji ngwâkavùùla bilàmbà byende kumpala kwa Adama wende kuvuulaye byende yêyè. Nwamonu anyi? Ûtu anu mmukaji, misangu yònsò. Ki cìtùku misangu yònsò. Cìcìdi anu mushindu wumwewumwe awu.

¹⁶¹ Ekeleeziya ngutu upambwisha mulume. Ûtu ng'ekeleeziya, nwamonu's, ùtu upambwisha mulume utu muswe kwikala mwànà wa balume wa Nzambi. Mmukaji's, ekeleeziya. Kî m'Bible, Nzambi to, bwalu Bible mmulume. Kaa, eyowa's, “Dîyi dyakvwijiibwa mubidi,” ne Yêyè uvwa Mulume. Nwamonu anyi? Bible mmulume; ekeleeziya mmukaji. Nwamonu anyi? Ekeleeziya kî ngutu. . . Bible kî ngutu upambwisha mulume to. Ekeleeziya ngutu umupambwisha. Ekeleeziya ngwâkashààlàye nende butaka, kî m'Bible to. Nwamonu anyi? To, cya bushuwa's. Bible udi umwambila mùdiye butaka. Eyowa's, mukalenge.

¹⁶² Mpindyewu monaayi mushindu wùdibi ne, ku disangila dya mulume ne mukaji, dijinga dya disangila dya mulume ne mukaji, yêyè wakaalakana dimanya, bwa kumanyaye ne *cikampanda* cìvwa ncinyi, ne mmushindu kaayi, bwa ne cimuma ciine eci cìvwa cìmpè anyi kacìvwa cìmpè. Ki kucyenzaye.

¹⁶³ Nzambi neàcyàngàtùlùlè dîngà dituku, nansha nanku, ku Mulume kampanda. Cyakalekelediibwa panshi kùdi mukaji kampanda. Kadi cyakapikudiibwa kùdi Mulume kampanda; Mulume awu, Yesu Kilisto, udi Dîyi awu.

¹⁶⁴ Nenu ncinyi aci dîbà adi? Monaayi, bwa kujikija. Mwab'ewu kî nkwanji kwenza ntanta mule to, ngâkamba dîyi edi. Ncicidi ne mabeji bu anaayi anyi ataanu nanku awu mwômô amu, kadi ndi. . . a Mifundu ne bikwabo bîmvwà njinga kuteela. Kadi, teejejaayi. Tujikijaayi, mu kwamba nunku.

¹⁶⁵ Vulukaayi ne, mwab'ewu kî nkwanji kwenza ntanta mule to, mvwa nnulongesha pa Mpungi Mwandamutekete, *Difestò Dyà Mpungi*, ne bikwabo. Nenu ngâkamba ne: “Kùdi difesto dya dituku dya mwandamukulu.” Pa nanku, dituku dya mwandamutekete ndivwà mwa kwikala dya ndekeelu, ki divwà mwa kwikala Bukalenge bwa bidimu cinunu. Kadi kùdi difesto dya dituku dya mwandamukulu; nenu, piikalà dyòdi adi ne divwa ndya mwandamukulu, pààkù kwikàle matuku anu

mwandamutekete, mbifwanyine kwenza ne dyôdi adi diikalè cyakabidi dituku dya kumpala, bafwanyine kwalukila ku dituku dya kumpala. Pashiishe, paanyima paa Bukalenge bwa bidimu cinunu bumane kujika, dibà adi nekwikalè Edena kampanda mwa kushindamijiibwa cyakabidi. Bukalenge bunene bwa Nzambi nebwanatuludiibwe. Bwalu, Yesu wakaBulwila mvita ne Sataana muyitwile ne cinyuku, mu lupangu lwa Getsemane, ne wakacimuna ne kwangatulula Edena, udiYe muye kalongolola mu Dyulu, bwa kwalukila cyakabidi, mwamwa mu Dyulu. Yèyè wakamba ne: “Myoyi yenu kayilubakanyi to.”

¹⁶⁶ PàvwàYe panu pa buloba, Yèyè wakamba ne: “Nwênù, nwênù beena Yuda, nwitabuuji Nzambi. Mpindyewu, Ndi mumanye ne Ndi ne luumu lubi,” mwakambaYe. “Ne badi bamba ne Ndi *cikampanda*, ne *cikansanga*. Kadi, nwênù nyawu nwitabuuji Nzambi; nenku bu munwitàbùùjì Nzambi, ngiitabuujaayi kabidi Mémè.” Yèyè uvwa Nzambi, mumweneshiibwe. Nwamonu anyi? “Ngiitabuujaayi kabidi. . .”

¹⁶⁷ “Mu nzubu wa Taatù Wanyi mùdi. . .yàbùngì.” Anyi ne: “Mu cibucilu cya Taatù Wanyi, mu mpàngù ya Taatù Wanyi mùdi myaba yàbùngì. Nènye kalongolola mwaba.” Tangilaayi bunene bùdiwu: cipaapu cya miles cinunu ne nkama yitaanu! Ambaayaaku tǔng, wùdi penyi? Yèyè mmuye bwa kuwulongolola. Yèyè m’Mufuki. Yèyè udi ufuka ngòlò yònsò awu. Misèsù nya lumwenu. Yèyè m’Mufuki. Ùdi munkaci mwa kwenza mwaba. Mu Bwakabuulwibwa 21, mmwambe ne: “Nenku mémè Yone ngâkamòna Cimenga cya cijila aci, Yelusalema Mupyamupya awu, cipweka cipàtukila kùdi Nzambi mu Dyulu.”

¹⁶⁸ “Kakùcìvwa kabidi mbù to; dyulu dya kumpala ne buloba bwa kumpala bikaavwa bijimine.” Maulu etu a kumpala àvwa ncinyi? S’ávwa m’Bukalenge bwa bidimu cinunu. Buloba bwa kumpala ncinyi? S’bùvwa ng’ebu nunku. Nebuvwijiibwe bupyabupya. Anu mwàkabàtijiibwàbu kùdi Noa, mu matuku a diyiiisha dyende amu; bwakajidiibwa kùdi Kilisto, paakamyaminaYepu Mashi Ende; ne nebuvwijiibwe bupyabupya, buumushapu twìshì twa màsaamà ne bikwabo byònsò, mu divwijiibwa dipyadipya ku ndekeelu, ku dibatiiza dya Kapyà kààshipà twìshì twònsò, bubeedi bwònsò, dìsaamà dyònsò, bukooya bwònsò bùkaavwàku pa buloba abu.

¹⁶⁹ Nebubwayike, bùpàtuka bwikàle Buloba Bupyabupya. “Ne ngâkamòna Dyulu Dipyadipya ne Buloba Bupyabupya. Dyulu dya kumpala, buloba bwa kumpala ebu, bikaavwa bijimine; ne kakùcìvwa kabidi mbù to. Ne mémè Yone ngâkamòna Cimenga cya cijila, Yelusalema Mupyamupya, cipweka cipàtukila kùdi Nzambi mu Dyulu.” Kuntwaku Nzambi neikalè ne byambiibwa Byende bilelela, bânà baa balume ne baa bakaji abu, kùdiYe mwa kwenzaku naabo bwobumwe mu cijila, ne mèsù abo

mafofomija ku mpekaatu kanà yònsò. Kakwadyakwikalaku kabidi mpekaatu to kubangila anu dîbà adi.

¹⁷⁰ Tùdyènzèjaayi ne mwetu mwònsò; kanuseeswishiibu mu dituku edi to, kadi, “dyènzèjaayi bwa kubwelela ku ciibi.”

¹⁷¹ “Bwalu bònsò baashiyabo pambelu nebìikalè basòmbì baa ne bandumba, baalakanyi.” “Èwu yònsò udi utangila muntu mukaji bwa kumwalakana wàmanyi kwenda nende masandi munda mwa mwoyi wende.” Bònsò bàdì ne. . . pambelu nepiikalè bakaji baa luumu lubi, balume baa luumu lubi, ne bikwabo.

¹⁷² Nenku anu bàdì bapikula nkaayaabo, ne biikàle mu Mukanda wa Mwoyi wa Mwànà wa mukooko, ki bààbwelelà ku ciibi. Pa nanku dyènzèjaayi, nwènù balunda baanyi; kanuseeswishiibu mu dituku dya ndekeelu edi to.

¹⁷³ Eci ncikondo cinene. Muntu yònsò ùdi ne mfranga. Muntu yònsò ùdi mwa kwenza *cikampanda*, ne muntu yònsò udi mwa kwenza *cikansanga*, ne mfranga yituuta nkoka nseke yònsò, ne tushinyi tunene, ne bintu byònsò. Kakwakwikala nansha kamwe mu Cimenga aci to. Kamwakwikala kashinyi nansha kamwe, ndeke nansha umwe to. To. Neciikalè dishidimuka dishiilangane anu menemene. Neciikalè cyakabidi dishidimuka dya kadiyi dya dimanya to, kadiyi dya maalu a mamanya to, kadi dya munda mutooke, ne diitabuuja mu Nzambi udi ne mwoyi.

¹⁷⁴ Tùdyènzèjaayi bwa kubwelaMu. Bwalu ki kaanyi kiipacila kònsò nkòkò aku, nkaa kubwela mu Cimenga aci dîngà dituku; kadi ntàngila anu paanyima nunku, bàdì bènda bàlwa naanyi, mmona muntu ne muntu wa kunùdi wènda wènda, patwikalà mwa kwimba musambu wa ne, “pààbwelà bansantu.” Mémè ndi muswe kwikala mu búngì abu pàbwelà bansantu.

Tusambilaayi.

¹⁷⁵ Taatù wa mu Dyulu munanga, pàkaadi matuku aya ku dijika apa, ne twètù tucimòna cyènda cìseemena, mulayi wukaadi wènda wùseemena. Nyewu tulomba, Nzambi munanga, bwa Wèwè kufunda cyòci aci pa mwoyi yetu, bwa katwikadi twàlwa kwenza ntupakananyi nansha ya kànà. Nzambi Munanga, lamaku kondo keetu kaa mwoyi katooke. Lamaku mwoyi yetu mibwikila ne cibwikilu, Mukalenge, mèsù etu mabwikila ku bintu bya pa buloba, ne ku bintu bya patupu bya pa buloba ebi, ku butumbi bwa patupu bwa kulwa muntu kampanda munene.

¹⁷⁶ Nansha biikalè banene baa bishi, bamfumu bònsò, bakookeshi, balombodi baa makookeshi maalabale, ne bikwabo byònsò bidì ne cya kubutuka, ne bóbò kabaakubiika ku lufu mu diibìd-. . . dibiika dya ku lufu dya kumpala adi to. Bwalu mbifundiibwe ne: “Wa dyakalenga ne wa cijila ng’ewu wikala mwabanyanganyi wa dibiika dya ku lufu dya kumpala, wikala lufu lwibìdì kaluyiku ne bukole kùdiye to.” Èyi Nzambi! “Lufu

lwibîdi,” lufu lwa nyuma, “kaluyiku ne bukole to”; yêyè awu mmupikudiibwe!

¹⁷⁷ Éyi Nzambi, pa kwela meeji ne dimwe dya ku mēbà aa, muntu neikalè muye kasamba mukwende, ne kwangaciibwaye muulu. “Babidi mu bulaalu, Nêngàngatè umwe, nshiye umwe. Babidi mu budimi, Nêngàngatè umwe, nshiye umwe.”

¹⁷⁸ Éyi Nzambi, tükwàcishèku bwa twètù kwikala bakezuke ku—ku mēsù Kwebe, Mukalenge, meeji àdì bantu batwelela nansha miikàle cinyi, cìdì bakwabo bantu bàmba nansha ciikàle cinyi. Mukakenge, enzaku bwa . . . nsòbèlu yetu yikalè ya cijila. Yikalè mitwe mukele ne Dìyì dya Nzambi, mitwe mukele, Mukalenge, mu mushindu wa budimu nansha bukesa kabuyiku mwa kusanganyiibwa munda mwetu to. Patùdì tusengeleela apa, mu bilema byetu twètù biine, bwa Mashì a Yesu Kilisto imaneku pankaci peetu ne Nzambi, mu mushindu wa ne Yêyè apwekeshile mēsù patùdì kupicila ku Mashì a Yesu; kî mpa bwakane bwetu twètù biine, anyi pa ne twètù tudi banganyi, pa citùdì benze to, kadi mpa kukumbanyina Kwende nkaayaaku. Nzambi, enzaku nanku!

¹⁷⁹ Swaku bwa muntu nansha umwe udi musòmbe kaaba aka diloolo edi ne muumvwe Mukenji, swaku bwa nansha umwe wa kùdìbo kajiminyiku to, kubangila anu ku mwànà wa mutambe bukesa too ne ku muntu mukole ku bònsò. Swaku bwa dijinga dyende dya cijila diikalè anu bwa Nzambi ne Dìyì Dyende. Katwena bamanye ne mpa dîbà kaayi piikalàYe mwa kumweneka to, anyi ne mpa dîbà kaayi piikalàYe mwa kutubiikila bwa kuya kalumbulula kwaka ku Cilumbulwidi to. Katwena bamanye ne mpa dîbà kaayi, mùtùdì mwa kwambs, mwikalàYe mwa kuumusha karta keetu mu cibumbù, kwamba ne: “Dîbà dya kwalukila kumbelu dyàkumbanyi. Bikengela uye.” Nzambi, tükwàcishèku bwa twètù kudilama bakezuke. Enzaku nanku, Mukalenge.

¹⁸⁰ Swaku bwa twìkalèku ne mwoyi too ne ku Dilwa dya Mukalenge, bu byòbì mwa kwenzeka. Swaku bwa twètù kwenza byònsò bìdì mu bwetu peetu bukole, biikàle ne dinanga ne dyumvwa, dyumvwa dya ne Nzambi udi munkaci mwa kukebulula pa buloba, leelu ewu, wènda ùpeta mukooko ne mukooko wònsò wùdì mujimine. Nenku swaku bwa twètù kwikala twakula naayi ne disambila ditwe mukele dya dinanga ne Dìyì dya Nzambi, bwa twamona mwa kupeta mwine wà ndekeelu awu, bwa twamona mwa kwalukila Kumbelu, ne kupatuka mu Edena wa kale wa Sataana wa panwapa ewu, Mukalenge.

¹⁸¹ Yêyè awu mmwibakila yònsò pa dyalakana, ne bakaji balenga, mùdìbo bababiikila pa buloba apa, ne mamanyisha abo mwaba awu ne: “Tudi tumanyisha, ne tudi baswe bwa bânà baa balume balwe ne kòmfitiilà mulaaba kwisù, ne bânà baa bakaji

balenga bavwale tuputulu,” biine abi anu ku tudyomba twetu ne ku télévion; ne bukooya ne bilaabu bya mishindu yônsò, ne Hollywood; nkanzu ya mishindu yônsò ya yisalulangana masandi, ya manyaanu, ya bukooya ya bakaji. Ne—ne bantu balume biikàle banyangakajiibwa ne bangata mvwadilu wa bantu bakaji, ne bakosessa nsuki byenze bu bantu bakaji; ne bantu bakaji benze bu bantu balume.

¹⁸² Éyì Nzambi, ndîbà kaayi dya dikwàcisha bwôwà ditùdì ne mwoyi edi’s we! Kaa, lwâku’s, Mukalenge Yesu, lwâku’s! Lwâku’s, Mukalenge! Tùkezùlèku ku Mashi. Tùmùshèku bukooya bwônsò ne budimu. Enzaku bwa twikalè ne mwoyi, Mukalenge, enzaku bwa twikalè ne mwoyi mwinshi mwa Mashi, dibà dyônsò, kumpala Kwebe. Ki cìdì dijinga dya myoyi yetu, ne dilomba dyetu dya meeji matooke.

¹⁸³ Nzambi munanga, nyewu mbateeke pa cibumb-...anyi pòpù apu, pa cyambilu, diloolo edi, mwaba wâtèekiibu Evanjeeliyo. Mukalenge, nyewu mishwala ne tubuki tukese biteekiibwe kaaba aka bìdì biya kùdì babeedi ne bàdì mu ntatu. Disambila dya diitabuuja, Mukalenge, diponèku dyùmukila mu myoyi yetu mpindyewu, ku mèsù Kwebe. Pashiishe, Mukalenge, kwôkò kwikalè cintu kampanda cibîipe munda mwetu, Mukalenge, angataku yetu...tùfikishèku ku cilumbulwidi mpindyewu; kabidi tudi tulomba luse. Tùsokòlwèlèku citùdì twenza cya cibi, Mukalenge, bwa twamonaku mwa kulomba, bwa kwangata Mashi ne bwa kutukezulawu. Ondopaku babeedi aba ubasangaje, Taatù, kwônsò kwabiteekabo aku, kwônsò kuyaayabi aku. Biikalèku nanku, Taatù.

¹⁸⁴ Tùpèèshèku dipangadika bwa kuKukwacila mudimu, anu Wèwè nkaayeebe. Enzaku nanku, Mukalenge.

¹⁸⁵ Filaku dikubiibwa kùdì bananga bàdì mu njila wa dyalukila ku mààbò aba.

¹⁸⁶ Twasakidila bwa mushindu Wùdì mwondope bantu. Ne mwânà wa balume mukese wa Mwaneetu wa bakaji Shepherd ne Mwaneetu wa balume Shepherd, udi mutapike ku dikalu ewu, ndi ndomba bwa bwalu bubu nansha bumwe kabùlukù ku cyôci aci to; mwânà mukese awu wèndesha dikalu dyende, ndi ndomba bwa kuumvwaye bîmpè. Tudi tuKwela twasakidila bwa dyondopa Dyebe dya bakwabo batwâlòmbedi aba. “Ne tudi bamanye ne citùdì tulomba, tudi tucipeta, bwalu tudi ne dyeyemena mu Ewu wâkafila mulayi.”

¹⁸⁷ Tùpèèshèku ngàsà Webe, Mukalenge, ne tûfwilèku luse ku mpekaatu yetu. Tudi tulomba mu Dînà dya Yesu Kilisto. Amen.

¹⁸⁸ Nudi baMunange anyi? Nudi nuMwitabuuja anyi? Nukaadi bacyoke bwa bukalenge bwa Sataana ne bumvwe bunwèndè ku mwoyi anyi? Nudi nwitabuuja ne bìdì bikafika too ne ku Bukalenge bwa bidimu cinunu, ku Bukalenge Bwende bwa

bidimu cinunu; Wende, ku Edena Wende anyi? Nudi nwitabuuja ne bwängàci mmwenekelu leelu ewu anyi?

¹⁸⁹ Tangilaayi, bintu byònsò mbishindameene pa mamanya a mu mitu. Byònsò, bintu byònsò, bikengela bwa bijaadikiibwe kumpala kwa kubiitabuuja.

¹⁹⁰ Kadi kwêna mwa kujaadika Nzambi ku maalu a mamanya nansha. Bikengela uMwitabuuje ku diitabuuja: “Bwalu ewu udi ulwa kùdì Nzambi udi ne cya kwitabuuja ne Yèyè udiku, ne mufuci wa aba bàdì baMukeba ne lukunukunu.”

¹⁹¹ Éyi Nzambi, ncyêna muswe kumanya cintu nansha cimwe to pa kuumusha anu Mashi a Yesu Kilisto àdì ankezula ku mpekaatu. Ncyêna mumanye cintu nansha cimwe to pa kuumusha anu Yesu Kilisto. Ne bu mwàkambà Pòlò wa kale awu, ki mùndì paanyi ngamba diloolo edi ne: “Ncyêna mumanye cintu nansha cimwe munkaci mwenu to, pa kuumusha anu Yesu Kilisto, ne Yèyè awu mupoopediibwe pa nkuruse.”

¹⁹² Ki cyònsò cìndì mumanye bwa kunwambila. Cya ne, Bible ewu, ngùndì mèmè ngiitabuuja ne mwoyi wanyi wònsò (piikalàbi ne ntu mumanye mwoyi wanyi) ne, ngudi Diyì dipwangane kadiyi disambakaja dya Nzambi. Ku Dyòdì edi nkùndì ne mwoyi. Ku Dyòdì edi nkùndì ngiimanyina kuulu. Kabidi bu ne mvwaku ne mwoyi binunu dikumi, mvw’a kujinga kufila kantu ne kantu kaa ku yòyi bwa Diyì edi, bwalu n’Diyì dya Yesu Kilisto. Ne nansha bôbò mwa kuteeta kujaadika ne n’Dya mafi bishi, nansha maalu a mamanya mateete kwamba bishi ne kî n’Dya kweyemena to, ne bikwabo, bwanyi mèmè, Dyòdì ki cintu cimwepele pa buloba cìndì mwa kweyemena, n’Diyì edi. Yèyè ngwanyi mèmè. Ndi muMunange. Kadi nwênù?

¹⁹³ Kwòkò mpekaatu kampanda mu mwoyi webe, kwòkò cilema kampanda mu mwoyi webe, wèwè ne cintu kampanda nansha ciikàle cinyi, sambila mpindyewu ulombe Nzambi bwa akufwile luse. Nunsambidilaayiku; mèmè nènnùsambidilè. Nzambi anubeneshe, ki dyanyi disambila.

Too ne patwasangila! too ne patwasangila!
Nzambi ikalè neenu too ne patwasangila
cyakabidi!

¹⁹⁴ Nudi banangangane muntu ne mukwende anyi? Yone mmwambe ne: “Bànà bakese, ikàlaayi banangangane muntu ne mukwende.” “Ikàlaayi banangangane muntu ne mukwende, bwalu dinanga didi dibwikila mpekaatu yàbùngì.” Mpindyewu muntu ne mukwende tulabulanganaayaaku ku cyanza.

Nzambi ikalè neenu too ne patwasangila
cyakabidi!

Too ne patwasangila! too ne patwa- . . .

¹⁹⁵ Mpindyewu ikàlaayi ne musangeelu muntu kùdì mukwende. Ikàlaayi ne musangeelu kùdì bantu bònsò. Ikàlà wenzelaku

mwena mutumba neebe bîmpè. Ikàlà mudilame kuyi katoba to too ne pààlwà Yesu.

. . . makàsà;

Too ne patwasangila! too ne patwasangila!

Nzambi ìkalè neenu too ne patwasangila

cyakabidi!

¹⁹⁶ Nudi baMunange anyi? Ki dyanyi disambila ndyôdi adi. Nunsambidilaayiku; mêmè nênnûsambidilè. Bikengela ngaalukile ku Tucson mpindyewu. Nênu ndi—ndi ndomba bwa Nzambi anubeneshe bônso. Nêngûumukilè kuntwaku nye ku Canada, ne ngaalukile ku Colorado; nyunguluke, nyunguluke, nyunguluke, nwamonu's. Too ne . . .

¹⁹⁷ Mwaneetu Tony udi usanganyiibwa kwôkò aku, ne cintu cinene ncyenzeke. Anu mu Vatican mene amu, mu Loomo, badi munkaci mwa kulomba ditabuluja, disangisha, bwa mêmè kuyaku bwa kwenza ditabuluja mu Loomo, mu Loomo amu. Yèyè mmufume ku dyalukila. Bantu badi bônso dîyi dimwe. Badi ne cipalu cinene cya manayi kuntwaku, cya myaba ya disomba binunu ne binunu, ne mbaswe bwa mêmè kuyaku bwa ditabuluja. Mbaswe kumona butumbi bwa Mukalenge mu mudimu wa bwambi. Mêmè ncyèna mumanye to. Bìdi bikengela nsambile pa bwalu abu, bwa mmone cyàngambilà Mukalenge aci. Kaa, ekelekele! Vulukaayi ne, tusambilaayi, twètù bônso pamwe. Tudi tukwata mudimu . . .

Tudi bindile dilwa dya Musungidi wetu mubeneshiibwe,

Monaayi, ne tangilaayi mabeji a mucu wa mfigi mpindyewu mukaadiwu asampila;

Evanjeeliyo wa Bukalenge Bwende mmuye ku ditunga ne ditunga dyônso;

Ne tukaadi pabwîpi ne nshiikidilu, bìdi mwa kumweneka.

¹⁹⁸ Ncya bushuwa anyi?

Dîbà adi ne disanka dyônso netukobole Mukenji wa dimweneka Dyende dibeneshiibwe ne,

Yèyè ulwalwa kataataka mu butumbi, bwa kwambila muntu ne muntu ne bônso;

Nanku tabulukaayi, nwênù bansantu baa Mukalenge, bwa cinyi kulaala tulu pàdîbi ne nshiikidilu ukaadi pabwîpi,

Tudilongololaayi ku dibiikila dya ndekeelu adi.

¹⁹⁹ NeWukudimukile ku wesete ne walukila cyakabidi mubànde pa kabalu, dimwe dya ku matuku aa, ikàlaayi anu bavuluke. Ncya bushuwa nanku. Ne aci ncyà bushuwa. Patwamba twètù kufikila ku diine dîbà adi:

Angata Dîna dya Yesu wëndè naadi,
Wèwè mwânà wa kanyinganyinga ne dikenga;
NeDikupe disanka ne busambi,
Nda naaDi, kwônsò kûyaayà.

Dîna dya musinga (Dîna dya musinga), Kaa,
dya bupole be!

Ditekemena dya buloba ne disanka dya Dyulu;
Dîna dya musinga, Kaa, dya bupole be! (dya
bupole be!)

Ditekemena dya buloba ne disanka dya Dyulu.

Twinamina Dîna dya Yesu,
Tupona mikookwela ku makàsà Ende,
Mfumu wa bamfumu mu Dyulu netuMwase
cifulu cya butumbi,
Paajika lwendu lwetu.

Dîna dya musinga, Kaa, dya bupole be!
Ditekemena dya buloba ne disanka dya Dyulu;
Dîna dya musinga, Kaa, dya bupole be!
Ditekemena dya buloba ne disanka dya Dyulu.

²⁰⁰ Mpindyewu, pa cituminyi cya ndekeelu eci, tùcimbàayi ne
myoyi yetu miinyika mpindyewu.

Angata Dîna dya Yesu wëndè naadi,
Bu ngabu ku buteyi bwônsò;
Ne pààkujìngà mateeciibwa nseke yônsò,
(bintu bya mu bukalenge bwa Sataana ebi,
nwamonu's, nwamonu's)
Nungana anu cyanaana Dîna dya cijila adi mu
disambila.

²⁰¹ Ki cyônsò cidîku ncyôcì aci; dîbà adi umuka uye. Cidi
cikwata mudimu. Mêmè nkaadi muciteeteete. Cìtábùùjaayi
anu cyanaana mpindyewu, bwalu necikwate mudimu. Nungana
anu cyanaana Dîna Dyende dya cijila adi mu disambila.

. . . Dîna dya Yesu wëndè naadi,
Bu ngabu ku buteyi bwônsò;
Ne pààkujìngà mateeciibwa nseke yônsò,
(Cyûdì wenza dîbà adi ncinyi?)
Nungana anu cyanaana Dîna dya cijila adi mu
disambila. (Cibwikilu necilwe kwîsù kwebe
dîbà adi.)

Dîna dya musinga (Dîna dya musinga), Kaa,
dya bupole be!

Ditekemena dya buloba ne disanka dya Dyulu;
Dîna dya musinga, Kaa, dya bupole be!

Ditekemena dya buloba ne disanka dya Dyulu.


²⁰² Twinyikaayaaku mitu yetu mpindyewu, pândi ndomba
Mwaneetu Beeler udi paanyima pàapa wawa bwa kulwaye

mwab'ewu ku cibumba cya ku cyambilu eku. [Mwaneetu Branham wabangi kwimbila mu matama *Angàta Dìna Dya Yesu Wëndè Naadì*—Muf.]

Nungana anu cyanaana Dìna Dyende dya cijila
adi mu disambila.

²⁰³ Wêwè ngudi ututagalaja, Mwaneetu Beeler. Wêwè ngudi ututagalaja mu disambila.

Dìna dya mushinga . . .
Ditekemena dya buloba ne disanka dya Dyulu;
Dìna dya mushinga (Dìna dya mushinga), Kaa,
dya bupole be!
Ditekemena dya buloba ne disanka dya Dyulu.

²⁰⁴ Mpindyewu ne mitu yetu miinyika, ne myoyi yetu miinyika. Mwaneetu Beeler, umwe wa ku beena dyetu kaaba aka, Mwaneetu Estle Beeler, mwaneetu mwena Kilisto wa maalu mîmpè, muntu wa lulamatu. Nêngiikalèku mwa kumulomba yêyè ní ùdikù mwa kutangalaja bateeleji aba, diloolo edi, mu disambila. Nzambi akubeneshe, Mwaneetu Beeler. 

EDÈNÀ WÀ SÀTAANÀ LUA65-0829

(Satan's Eden)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu diloolo, mu matuku 29 a ngondo wa mwandamukulu, cidimu cya 1965, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêyi ne dituuta ku cyamu mu kaabujima kââdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2019 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org